

FREDERICI AUGUSTI LUDOVICI ADOLPHI GROTEFEND

CLAUSTHALIO - HANNOVERANI

SEMINARII REGII PHILOLOGICI ET HOMILETICI NEC NON SOCIETATIS
THEOLOGICAE GOETTINGENSIS ANTEHAC SODALIS.

COMMENTATIO

IN QUA

DOCTRINA PLATONIS ETHICA CUM
CHRISTIANA COMPARATUR-ITA UT UTRI-
USQUE TUM CONSENSUS TUM DISCRIMEN
EXPONATUR.

IN CERTAMINE LITTERARIO

CIVIUM

ACADEMIAE GEORGIAE AUGUSTAE

DIE IV. JUNII MDCCCXX.

PRAEMIO REGIS MUNIFICENTIA CONSTITUTO

EX SENTENTIA

VENERABILIS THEOLOGORUM ORDINIS

ORNATA.

Θεός μὲν ὁ Πλάτων, Θεός δὲ ὁ Χριστός.

GOETTINGAE

PROSTAT IN LIBRARIA VANDENHOEKIO - RUPRECHTIANA.

MDCCCXX.

*Commentatio exhibens doctrinam Platonis ethicam atq. christianam
expositionem & comparationem. auct. G. H. Kleppel. Götting. 2423. 2477.*

1822

1822



PRAEFATIO.

I.

Saepe numero mihi de miro Platonicae atque Christianae tum universae doctrinae, tum potissimum ethices consensu cogitanti, dubitanti tamen, num tanta sit ista, quantum ab illis qui de eadem re verba fecerunt, plerumque exhibeatur, an potius egregia Christianae ethices auctori prae Platone vel in moralibus doctrinis praestantia sit adjudicanda, quum aliquot Platonis libros jam antea legissem, ejusque philosophiae omni industria incubuissem, quid potuit esse jucundius, quid magis opportunum, quid denique quavis ratione magis exoptatum, quam illius theologorum ordinis judicio, qui in hunc annum cives Aetnaeae Georgiae Augustae

ethices Platonicae atque Christianae comparisonem, ita ut utriusque tum consensus, tum discrimen exponeretur, institueret

jussisset? At vero, posteaquam ad illud opus fuscipiendum me accinxeram, quo magis in ipsa disquisitione progressus essem, eo magis subinde emicabant tantae difficultates, quantas parvis viribus superandas admodum diffiderem. Ne dicam immensum fere ambitum librorum in quibus morales Platonis doctrinae modo uberius expositae, modo dispersae et tanquam disjecta membra jacerent, tanta est philosophi nostri obscuritas, et difficilis atque subtilis in omnibus ratio,

ut veram ipsius mentem nisi assidua diligentia et acerrimum ingenium divinare non possit. Nihilotenus vel parvas, ratus, vires, si modo cum studio et diligentia tentaverint, et in magno conamine saltem aliquid esse profecturas, ipsoque tentando roborari, minime inceptum opus abjiciendum putavi, sed qualicumque successu perficiendum. Itaque si quid aut praetermisisset, aut ut in tanta re minus intellexisset visum sim, dum ne studium et diligentia desideretur, me eorum, qui harum rerum sunt gnari, veniam esse impetraturum, haud despero.

II.

In tota vero disquisitione non in agendum mihi visum est, ut denuo moralis Christi et Apostolorum doctrina recognosceretur, quum omnium virorum doctorum in his tantus sit consensus, ut si quaedam singula eaque, quae dicunt, positiva excipias, nulla fere sit doctrina de qua utrum vere Christiana sit necne, quisquam dubitare queat. Sed illud summi momenti est, ut Platonis ethicam denuo ex scriptis ipsius recognitam, enucleatam et probatam quisque perspiciat et intelligat, qualis sit ratio ad vim ethicæ Christianae, quae in universum pro cognita omnibusque probata haberi potest. Itaque non opus esse putavi, ut utramque ethicam prius exponerem, quam compararem, sed Platonis doctrina in quaque re enucleata et probata, statim institui comparisonem cum dictis et sententiis Novi Testamenti.

III.

Duo potissima mihi visa sunt momenta, quae in universa quaestione comparanti observari debeant, alterum, ut ipsa expositione elucescat, utri major debeatur laus in singulis omnibus, ubi vel omni partium studio abjecto christianae ethicæ palmam adsignare possumus; alterum hoc: utrum cogamur, si qua egregia similitudo utriusque ethicæ emicet, de externa quadam cognatione cogitare, an potius causæ

ad sint potiores, unde tanta similitudo profecta sit. Etenim facile quisquam in illam incidet sententiam, ut Platonis principia ethices Christianae autoribus undecunque innotuisse existimet. Quo cognito, etiamsi merito Servatoris nostri nihil damni afferatur, tamen juvat, verum hac de re indagare iudicium.

IV.

Universae rei cardo versatur in comparatione generalium principiorum et ipsius fundamenti utriusque ethices. Ea enim praecepta, quae ad singulas virtutes, singulaque officia spectent, tum in omnibus fere ethicis eadem sunt, tum ex vi ipsorum principiorum apte possunt derivari. Praeterea illa, quibus Plato a Christiana ethica recedat v. c. praecepta de inimicorum amore *), jam satis superque sunt ab aliis exposita. Denique si singula quaeque exponere et comparare voluissem, aut in immensam molem opus excrevisset, quum vel sic aliquantum modum excefferit, aut illa, quae summi sunt momenti obiter tantum et negligenter tractari potuissent. Itaque quum pauca funditus explorare et exponere, quam multa obiter tangere mallet, acquievi in vi atque principis ethices tam Platonicae, quam Christianae quam potui diligentissime exhibendis, singulis praeceptis eatenus spectatis, quatenus in universam vim ethices aliquid conferrent.

V.

Praeterea vero externam quoque rationem utriusque ethices non plane existimavi omittendam, quum inde ipsa doctrina aliquam lucem accipiat. Et ante omnia finis et Platonis et Christi, quo ethicam constituisent, spectandus erat, ne illo neglecto falsum de utroque existeret iudicium, neque quid vitio illis verteretur, quod minime meruerint.

*) Vid. L. P. Hüpeden Commentat. qua comparatur doctrina de amore inimicorum christiana cum ea, quae in libris philosophorum graecorum cet. traditur. Gott. 1817.

Deinde vero et de forma Platonicae atque Christianae ethices aliqua erant monenda, quoniam simul illis via monstratur, qua ad enucleandas utriusque doctrinas progrediendum sit.

VI.

Denique in universa quaestione nullum sequutus sum duce[m], nisi ipsos Platonis et Novi T. libros, ne ullius auctoritate ab ea via deducerer, quam ipse mihi descripsissem, et optimam esse putarem. Posteaquam ex ipsis Platonis libris systema ejus ethices mihi composui, tum demum alios quosdam adii Platonicae philosophiae interpretes, et gaudeo, quod cum potioribus ipsorum in plurimis consentio. In reliquis vero malo verum non vidisse, quam aliorum auctoritati concedere, cujus ipse in libris Platoniciis nullum vestigium invenerim. In legendo Platone adhibui editionem Stephani tribus voluminibus absolutam, cujus paginae et Bipontinae in margine adscriptae sunt.

VII.

In probandis Platonis sententiis eos potissimum sequutus sum libros, quos omnes uno ore genuinos esse constantur, Phaedrum, Phaedonem, Gorgiam, Theaetetum, Timaeum, Symposium, libros X de Republica; ex reliquis tales tantum laudavi locos, quales cum principiis Platonis aperte consentiunt, et quos Platonis mentem referre nemo unquam negabit. Quamquam nonnulli libri, qui Platoni adjudicantur, ipsum autorem non habeant, tamen multa Platonica illis inesse, non est quod quisquam neget.

VIII.

Si quis velit illos libros de philosophia Platonis cognoscere, qui potissimum huc ferant, inveniet illos natatos in: Tennemanns Grundriss der Geschichte der Philosophie. p. 91. 2te Auflage 1816. adde: Astii: Platons Leben und Schriften. Leipz. 1816.

CONSPECTUS.

PARS PRIOR.

Comparatur ethices Platonicae atque Christianae externa ratio.

CAP. I.

Disquiritur de fine, quem Plato et Christus sequuti novae ethices auctores facti sint.

- §. 1. Exponitur Platonis finis in ethica sua constituenda.
- §. 2. Exhibetur finis Christi in eadem re.
- §. 3. Utriusque finis instituitur comparatio.

CAP. II.

Disquiritur de ratione, qua Plato et qua Christus morales suas doctrinas exhibuerint.

- §. 4. Exponitur hujus disquisitionis momentum.
- §. 5. Disquiritur de systematica forma Platonicae ethices.
- §. 6. Quid in eadem re de ethica christiana censendum sit.
- §. 7. Exponitur diversa ratio Platonis et Christi, quatenus ille suam sententiam tradit, hic Deo doctrinam suam acceptam refert.
- §. 8. Comparatur externus habitus et ornatus ethices Platonicae atque Christianae.

PARS POSTERIOR.

Comparantur ethices Platonicae atque Christianae principia.

CAP. I.

Disquiritur de summo principio ethices Platonicae, et si quid simile est in ethica Christiana.

- §. 9. Disquiritur de Platonicae ethices summo principio (*ἀπολογος θεῶν*).
- §. 10. Instituitur comparatio illius principii cum ea lege Christianae ethices, qua jubet hominem Deo similem fieri.
- §. 11. Additur iudicium quod inde de externa quodam ethices Platonicae et Christianae cognitione ferendum sit.

CAP. II.

Inquiritur in virtutis tam Platonicae quam Christianae naturam.

- §. 12. Exponitur virtutis natura qualis in libris Platonis exhibetur.
- §. 13. Instituitur comparatio virtutis Platonicae cum virtutis Christianae natura.
- §. 14. Exhibentur, quae inde de externa ethices Platonicae et Christianae conjunctione iudicanda sint.

CAP. III.

Disquiritur de virtutis ad felicitatem ratione, qualis illa in Platonica atque Christiana ethice est constituta.

- §. 15. Exponitur ratio virtutis ad felicitatem quam Plato docuerit.
- §. 16. Instituitur comparatio cum iis quae de eadem re in N. T. tradantur.
- §. 17. Exhibetur inde iudicium, externam Platonicae et Christianae ethices conjunctionem spectans.

CAP. IV.

Disquiritur, quod Plato virtutis initium esse voluerit, ejusque ad Christianam animi emendationem (*μετάνοια*) ratio.

- §. 18. Exponuntur de ea re Platonis principia.
- §. 19. Adjicitur Christiana doctrina de animi emendatione, (*μετάνοια*) ita ut utriusque discrimen elucescat.

EPILOGUS.

- §. 20. Totius commentationis summa breviter repetita, sit conclusio.
-

P A R S P R I O R.

COMPARATUR ETHICES PLATONICAE AT-
QUE CHRISTIANAE EXTERNA RATIO.

C A P U T I.

DISQUIRITUR DE FINE, QUEM PLATO ET CHRISTUS
SEQUUTI NOVAE ETHICES AUCTORES
FACTI SINT.

§. I.

De fine atque consilio, quo Plato moralem suam doctri-
nam constituerit, potissimum feremus iudicium et verissi-
mum, quando ad ista tempora, quibus vixit philosophus
noscer, respexerimus. Platonis aetate in Graecia et Athenis
potissimum schola exorta erat philosophorum, qui ut reli-
quas philosophiae partes, ita moralem potissimum tractan-
dam et variis modis ventitandam sibi sumissent, ita tamen,
ut omnem veram virtutem subtili quadam et fallaci dialectica
pellerent potius, quam firmarent et auditorum animis infi-
gerent. Socrates tamen aequo sano sensu et veri virtutisque

amore ductus, ac philosophiám istorum hominum, qui Sophistarum nomine veniunt, perosus, unus exstitit, qui sincera ingressus via ad veram ethicam tradendam atque juvenilibus Atheniensium animis informandam, falsam Sophistarum disciplinam et rationem evertere studeret. Neque tamen multum profecit, quamquam doctrinae suae novitate plures nobiles Atheniensium juvenes ad se attlexerat, quum eo destitutus esset ingenii acumine, quo solo Sophistarum perversitas et damnosa ratio detegi et in vera luce poni potuisset. Jam vero Plato, insignis Socratis discipulus, pari quidem animi integritate, altiore tamen ingenio atque doctrinâ, facili negotio fallacem et perversam Sophistarum methodum perlustrabat, et omnino is erat, qui pellere illos et opprimere posset. Bene autem perspectum habuit, singulis istis doctrinis, et abrupte positis praeceptis, quae a Socrate edoctus esset, nihil fere contra Sophistas effici posse, sed altiore, ratus, opus esse iudicio, ante omnia falsam Sophistarum dialecticam evertere, veramque philosophandi viam monstrare adortus est. Quod quidem passim fecit tum in omnibus dialogis suis, tum potissimum in Phaedro, ubi aperte suam philosophandi rationem opponit Sophistarum methodo. Et firmam sane munivit philosophiae viam exposcuians, ut philosophus ante omnia a singulis rebus, quae in sensus cadunt, abstrahat notiones quasdam generales, earumque certam firmamque sibi comparet rationem atque definitionem, deinde autem notiones illas generales accurate secernat in notiones speciales, et ita descendat ad res individuas, ut cujusvis rei firmam sibi possit exhibere notionem atque definitionem¹⁾. Quam quidem rationem ipse sequutus est in disquisitionibus omnibus. Non tamen in eo acquiescere poterat, ut Sophistarum rationem atque methodum falsam esse, et a vero longius abducere probaret, sed ipsa eorum principia atque

1) Egrege haec expressit in Philebo. T. II. p. 20 sqq.

praecepta refellenda erant atque evertenda. Inanibus autem armis dimicasset, si singulis praeceptis oppositis illis, hoc efficere studuisset; ad intimas atque remotissimas agendi causas, et ad summa ethices principia progrediendum erat, atque omnibus partibus cohaerens disciplina constituenda. Nullo enim alio modo Sophistarum potestas in animos hominum effringi poterat. — Abruptae enim opiniones, et praecepta per se posita, aliquamdiu quidem placent, et pro veris habentur, nisi vero firmo fundamento illigata sunt, facile labefactata ex animo eripiuntur²⁾. Quo factum est, ut videamus omnem operam Platonem navasse in principiis ethicis fundandis et firmandis, minus curans singula praecepta omnia ex iis derivanda. Itaque nec ex singulis quibusdam praeceptis atque doctrinis de tota Platonis ethica iudicium ferendum, sed ex universo principiorum et sententiarum connexu vera quaedam notitia haurienda est.

Quae quum ita sint, jam sponte sequitur, non esse illam ethicam, quam vulgaris quisque et indoctus homo intelligere et adhibere possit, sed talem esse qua doctus tantum atque philosophus recte possit uti. Quis enim, nisi doctus et cogitando adfuetus, ad intimas veritatis latebras mente sequi, et inde a summis principiis singula sibi, officia ac praecepta deducere valet? Neque vero aliud quidquam agere potuit Plato, nisi ut docte rem suam tractaret; Sophistae enim philosophi ac docti homines re-

2) Quod ipse Plato professus est in Menone. T. II. p. 97. E. 89. A. καὶ γὰρ αἱ ἀληθεῖς δόξαι, ὅσον μὲν ἂν χρόνον παραμένωσι, καλὸν τὸ χρῆμα, καὶ πάντα τὰγαθὰ ἐργάζονται· πολὺν δὲ χρόνον οὐκ ἐθέλουσι παραμένειν, ἀλλὰ δραπέτευουσιν ἐκ τῆς ψυχῆς τοῦ ἀνθρώπου· ὥστε οὐ πολλοὺ ἔξαι εἶσιν, ἕως ἄν τις αὐτάς δῃσῃ αἰτίας λογισμῷ. π. τ. λ. Cf. Phaedr., T. III. p. 256. sq.

fellendi erant. Quod tamen qui fieri potuit, nisi docto et philosophico modo? Sophistarum vis in animos nobilium ac eruditorum juvenum coërcenda erat; itaque eruditissimis animis Platonem ethicam suam scripsisse necesse est. In vulgus enim nec altioris indaginis homines minimam vim Sophistae exercuerunt.

Restat, ut eam sententiam irritam esse probemus, quae et a veteribus et a recentioribus quibusdam ³⁾ prolata est, Platonem splendoris atque gloriae magis fuisse cupidum, quam veri virtutisque studiosum, et saepenumero veritatem arti atque sublimes orationi postposuisse, ne multa, Sophistam illum fuisse omnium maximum. — Non illud negamus, non in omnibus dialogis reperiri veram Platonis mentem, immo lubenti animo concedimus saepe philosophum nostrum non id egisse ut vera quaedam sententia in fine disputationis ponatur, sed subtili dialectica verum ipsum pepulisse. Attamen nemo, si modo paullo accuratius rem spectemus, Platoni illud vitio vertet. Quum enim Plato duplicem sibi proposuisset finem, alterum ut Sophistas offenderet atque ridiculos prostituere, alterum ut pro falsa istorum ratione et disciplina vera philosophiae jaceret fundamenta: utrumque finem modo conjunxit, modo separavit. In omnibus istis libris, ubi Socratem cum Sophista quodam interloquentem facit, nihil aliud illum sibi proposuisse censeo, quam ut ostenderet illorum stultitiam vanamque ostentationem, utque illos, qui in dialectica verfatissimos sese jactarent, ipsius dialecticis vinculis ita irretiret, ut pudore suffecti, ipsi ignorantiam suam confiteri coacti essent. Hoc studium satis apertum est in Euthydemo, in Hippiam maiore et minore, quibus si omnia quae infunt, veram Platonis fuisse sententiam

3) Dionys. Hal. V, 208. 209. VI. 964. 972. 1032, Meiners Gesch. der Ethik, T. I. p. 196.

putaremus, ridiculum prorsus ipsum Sophistam faceremus. In reliquis autem hujus generis dialogis, in Protagora et Gorgia, etiam si summum argumentum revera Platonis mentem referre putemus, tamen minime singula quibus illud probare studeat, genuinam philosophi doctrinam esse arbitrandum est. Quod quidem satis manifestum sit, instituta Protagora et Menonis comparatione, in quibus unum idemque argumentum tractatur. Negatur enim in utroque doceri posse virtutem. Sed vide quam longe utriusque ratio distet! Protagorae Socrates ne verbum quidem largitur, sed cumalatis sophismatibus eum irretit, nullum argumentum ad finem prosequitur, sed ab uno ad alterum celerrime transgreditur. Nec omnino tota quaestio, de qua sermo est solvitur, sed Sophistam ridiculum prostitutum atque pudore suffusum relinquit Socrates. In Menone autem, ubi non Sophistam adversarium, sed juvenem Atheniensem auditorem habet, eandem rem ex altissimis philosophiae causis repetit, riteque expendit, quid sit virtus; et in his fundamentum illud philosophiae platonicae, idearum doctrinam, cujus in Protagora nullam fecisset mentionem, rursus deprehendimus. Hoc demum in dialogo res, de qua sermo est ad finem perducitur, ut veram inde Platonis mentem conspiciere possimus. Qui vero Plato Sophistas melius potuisset vincere, quam ipsorum armis illos premens, et quid profecisset, si tanta superbia tumentes alia quadam via meliora docere conatus esset? — Quis igitur subtilem istam artem atque fallaciam, illo fine perspecto, opprobrio vertet, quum in reliquis Platonis libris nullum istius vestigium reperiatur? — His autem summum veritatis studium tam manifestum inest ⁴⁾, ut nemo Platonem eam ob causam satis possit admirari. Qui praeterea fieri potuisset, ut is, qui Sophistarum rationem atque me-

4) Cf. potissimum locos hosce: Phaedr. T. III, p. 273. D. E. 276. 278.

thodum ubique fere ridiculam et abominandam reddere studeat, ipse Sophistarum maximum sese exhibuerit? Qui fieri potuisset, ut is, qui totis viribus conetur ⁵⁾ ne male intelligantur, quae vera esse sibi persuaserit, utque recte percipiant homines, quid sibi velit, arte et fallacia falsas opiniones atque sententias lectoribus et auditoribus suis obtrudere voluerit? Compares quaeso eam rationem firmanque viam, qua Plato aliquid probare studet ⁶⁾ cum Sophistarum methodo, et admiraberis studium illud quo semper ad altissimas veritatis sedes penetrare conatus est, atque defines philosophum nostrum Sophistam putare, qui non vera sed artificiose excogitata suadere voluerit.

Sed etiam si cogeremur largiri, in rebus metaphysicis Platonem interdum magis gloriam et novitatem sectatum esse, quam veritatem, tamen eandem in ethica ipsius rem esse, nemo unquam probabit. Certissimum est, illum fuisse Platonis finem in rebus mores et vitam spectantibus, ut vera, non nova quaereret.

§. 2.

Quando nunc spectato et exposito Platonis consilio in ethica sua constituenda, ad illum finem animum advertimus, quo Jesus magnum istud atque egregium opus novam de virtutibus officiisque doctrinam humano generi tradendi, adortus sit atque perfecit: ante omnia rursus illorum

5) Cf. v. c. Phaedonem, ubi coelum terramque mover ad animae immortalitatem probandam, ne ullum relinquatur dubium.

6) V. c. in Philebo et Phaedro. Egregie quoque in Cratylo. p. 64. Socrates profitetur, quantopere cavendum sit, ne in disquisitionibus a nobis ipsis decipiamur: *δοκῇ μοι χρῆναι ἀπανασκέψασθαι τι καὶ λέγω. τὸ γὰρ ἐξαπατάσθαι αὐτὸν ὑφ' αὐτοῦ πάντων χαλεπώτατον. κ. τ. λ.*

temporum, quibus ille prodiret, habenda est ratio. Tres fuerunt tunc temporis inter Judaeos scholae, Pharisaeorum, Sadducaeorum et Essenorum, quarum quaevis sibi suam formavisset philosophiam moralem ⁷⁾. Pharisei nimis anxie non solum in libris V. Testamenti, sed in traditionibus quoque haerentes, et externos usus, caerimonias, sacrificia ritusque summam religionis putantes, dum veram atque sinceram animi virtutem negligebant, aura populi quam maxime fruebantur, illumque a vera virtutis via ad superstitionem atque falsas opiniones abducebant. Sadducaei autem, quamvis puriorem ethicam docerent, et graecorum quoque philosophorum placita admitterent, tamen animae immortalitatem, aeternamque tam virtutis remunerationem, quam peccatorum punitionem negabant; quo factum est, ut hominem probum et honestum omni spe et solatio privarent, improbum vero et sceleratum securum redderet in peccando. Qui tamen minimum in plebem valentes, inter divites et optimates imperii satis amplam sectam sibi paraverant. Esseni denique rigidis et monasticis fere moribus insignes, omnem vitae jucunditatem societatemque humanam fugiebant, et in silvis locisque desertis solitariam degebant vitam. His igitur potissimum sectis, quum populus Judaeus in diversas traheretur partes, maximumque inde mores ejus caperent detrimentum, divinum Jesus cepit illud consilium, ethicam constituendi quae omnibus satisfaceret, omnibusque simul ostenderet viam ad summam praestantiam moralem assequendam. Veram atque sinceram virtutem, quae vires humanas non excederet, voluit restaurare, simul confirmata ea fide, qua aeternam animi vitam, justamque felicitatis et miseriae post mortem retributionem speramus; quae quidem spes hominibus efficacissimum semper fuit momentum ad recto

7) Uberius sectas illas descripsit Ven. Staeudlin in: *Gesch. der Sittenlehre Jesu* Bd. 1. p. 417 ff.

probeque vivendum. Non doctrinam philosopho tantum intelligendam tradere voluit, sed eas virtutes, eaque officia et agendi praecepta docuit, quae omnes facile animo comprehenderent, quibusque servatis omnes animi tranquillitatem veramque felicitatem nanciscerentur. Neque vero unicuique populo, vel Judaeis potissimum doctrinam suam destinavit, sed toti generi humano servator et praeceptor esse voluit; itaque ethicam suam ab omni civili institutione civitatumque legibus separavit.

§. 3.

Jam hoc modo exposito fine, quo Plato et Christus ethicam suam constituerint, suavis exoritur utriusque comparatio, jamque in his magnum detegitur discrimen. Quamvis enim uterque homines a falsis opinionibus atque principiis liberare, temporum depravationi occurrere, atque firma principia, veramque virtutis viam ostendere et munire studuerit, tamen pari modo illud non fecere. Platonis enim temporibus eruditorum et altioris loci hominum mores et opiniones, Sophistis auctoribus, majore affecta erant labe quam reliqui populi, at vero quum Christus prodiret, inferiores potissimum populi Judaei homines a Phariseis in falsas opiniones, falsamque agendi rationem abducti erant. Quo factum est, ut alter eruditos et altioris indaginis homines potissimum sibisumeret docendos, alter vero populi partem minus cultam ante omnia emendare vellet. Doctos ille Sophistas, populares hic Phariseos redarguit. Licet vero concedamus, id quod fortasse verum est, Platonem id potissimum egisse, ut a doctis hominibus incipiens, reliquo etiam populo paulatim veriora principia impertiret, nemo tamen historia et experientia edoctus, contendet, recta illum hac in re via profectum esse. Omnium enim temporum historia probatur, doctrinam, quae ab initio philosophis tantum et doctis auribus destinata fuerit, nunquam e scholis invulgas propagari; sed

una cum schola perire; id quod revera Platonis quoque ethicae accidit. Meliorem igitur haud dubie viam Christus ingressus est, qui a populi turba profectus, huic ante omnia veriores purioresque rerum atque officiorum notiones, sinceramque virtutem tradendam esse censuerit, minime dubitans, quin deinde magis magisque principiis suis in vulgo propagatis, doctiores etiam homines et philosophi illa benigne ac sponte accepturi essent. Nec expectationi successus defuit. Quamobrem Servatori nostro magnam sapientiae et rerum intelligentiae prae Platone praestantiam adjudicandam esse censeo. Fortasse tamen aliquis non sine aliqua speciosa ratione objicere posset, rem istam positam fuisse in rerum ac temporum conditione. Quum enim inter Judaeos Pharisei in populi turbam, inter Graecos autem Sophistae in eruditos potissimum homines vim suam damnosam exercuerint, nihil fuisse magis in re atque natura positum, quam ut a principio Christus in plebem Plato vero in philosophos animum adverterit, nec secundum consilium et expectationem, sed forte fortuna factum esse, ut ethicae Christianae major, amplior diutiusque durans quam Platonicae in animos hominum vis contingerit. Etiam si haec aliquis objiciat, tamen nihil inde meritum Christi capiet detrimenti. Manifestum enim est, et expluribus Jesu ipsius dictis ^{a)} patet, eum omnes homines nulla facta exceptione, doctrina sua in unum conjungere gregem voluisse. Quod autem si ipse voluit, ipsius sapientiae, nec casui tribuendum est, quod eam ingressus est viam, qua revera voti sui atque consilii compos factus sit. Quisque igitur, uti volet, ponat Platonem aut philosophos tantum, aut vulgus quoque per philosophos emendare et docere ethicamque suam universalem reddere voluisse, Christo semper major aut voluntatis aut sapientiae

8) Matth. 28, 19.

laus quam Platoni tribuenda est. Accedit autem, quod Plato profecto non speravit, doctrinam suam moralem patriae suae fines excessuram esse, nec in animo habuit gentibus quoque barbaris ethicam scribere, (alioquin enim praecepta sua et principia non tam arcte aut civilibus institutionibus aut populi sui opinionibus ac religionibus junxisset) Christus vero omnibus hominibus una cum religione sua, ethicam suam tradere voluit et commendare. Quodsi miramur Platonis egregium ingenium, quod ad istud usque tempus inaudito modo ethicam tractavit, multo magis miranda est Jesu illa animi ingenique excelitas, qua neque philosophorum tantum scholis, neque uni populo, sed universo mundo, novam eamque purissimam et salutiferam de Deo et homine doctrinam tradere constituerit.

CAPUT II.

DISQUIRITUR DE RATIONE, QUA PLATO ET QUA CHRISTUS MORALES SUAS DOCTRINAS EXHIBUERINT.

§. 4.

Quamvis haec levioris momenti esse videatur disquisitio, ratione habita illius finis, quem nobis in his proposuimus, tamen haud plane eam putavi praetermittendam. Etenim primum ratio et externa forma ethicae Platonicae atque Christianae largissime cohaerent cum fine autorum, modo a nobis exposito, et haud minima inde lux illi suppeditat. Deinde autem ratio et externa forma recte perspecta et exhibita, quam maximi momenti est, ut veram doctrinae ipsius mentem intelligamus. Denique suavis inter utramque rationem intercedit similitudo, conjuncta simul

cum mira dissimilitudine. Hae causae fuerunt, quibus adducti de ratione Platonicae et Christianae ethices jam aliqua verba faciemus.

§. 5.

Utrum Plato revera moralis philosophiae systema, quod nostri homines vocant, in animo habuerit necne, non est quod hoc in loco dijudicare possimus, quum quaestio illa ex ipsis ejus doctrinis ad finem perducere debeat. Eam tantum adhuc formam spectamus, qua indutam ethicam Platonis accepimus. Sole autem clarius est, Platonem doctrinas suas systematica forma indutas non exhibuisse. Non unum cohaerentem et perpetuum nobis scripsit librum, in quo universam ethicam a summo principio profectus et in singulas inde doctrinas descendens, tractasset, sed singulis eam dialogis disposuit, et passim reliquis philosophiae suae partibus immiscuit. Nihilominus interior quidam connexus quorundam dialogorum ⁹⁾ et principiorum omnium facile detegitur. Saepe enim fit, ut haec vel illa primaria doctrina in aliquo dialogo indigitetur tantum, atque primis lineamentis depingatur, quam deinde in alio libro copiosius tractatam et expositam reperiamus, et unde aliae sententiae atque praecepta deriventur. Hoc modo, ut exemplum exhibeamus, doctrinam de ideis philosophus noster obscuro et allegorico modo indigitat in ea pulcherrima oratione de amore, quam in Phaedro legimus. Eandem deinde doctrinam paullo clarioribus verbis expressit in Symposio; sed vera lux demum his omnibus affunditur, ubi legerimus Philebum, Phaedonem, Parmenidem, Theaetetum, aliosque libros, ubi Plato manifesto docet, quid sibi illis ipsis ideis

9) Vide dialogorum connexum, quem acutissime illustravit Astius in: *Leben und Schriften des Platon praeterea Schleiermacher in: Uebers. des Platon. Tom. I. Einleitung.*

suis voluerit, qualemque in tota philosophia sua tam metaphysica, quam morali vim habeant. Itaque summa atque primaria ethices principia atque fundamenta; per omnes hujus generis dialogos, si nonnullos exceperis, semper recurrunt, modo obscurius et brevioribus verbis, modo clarius et copiosius expressa. Quo fit ut unum dialogum ex se ipso explicare et intelligere nequeas, nisi reliquorum etiam rationem habueris. Singuli enim loci per se positi saepe ambigui et obscuriores esse videntur, nec veram Platonis mentem divinare possemus, nisi alios locos, totumque interiore Platonis philosophiae connexum adhibere et comparare liceret. Quisquis igitur Platonem in omnibus recte intelligere cupit, is universum singulorum locorum connexum spectet necesse est, neque uni abrupte posito loco, etiamsi certissimus sit nimium confidat; quam maximos enim inde Platoni posset obtrudere errores; id quod a multis Platonis interpretibus saepe factum est. Hinc quoque multi fluxerunt loci reliquis contrarii, quibus platonica scripta laborare vulgo dicuntur. Ex his autem conficitur, cohaerentem et quandam systematicam rationem Platonis philosophiae omnino inesse, unde jam nunc auspicari licet, de quo infra verba faciemus, revera illum systema in animo habuisse. Praeterea autem, si singulos quosdam dialogos spectemus in his plena atque absoluta prorsus ratio illa systematica non cognosci non potest. Legas v. c. *Philebum* ¹⁰⁾, ubi ipse diserte dicit, proficiscendum esse in

10) T. II, p. 13. sqq. Postquam Socrates aliquamdiu cum Protarcho disputavit de summo bono utroque contrarium alteri contendente. Socrates dicit, non posse ad finem perducī quamlibet disputationem; altera sententia alteri opposita, nisi in altiores causas et generales rerum notiones adscendatur. p. 13. D. ὅτι σε μιμούμενος ἐγὼ καὶ αἰννύμενος εἴην τολμᾷ λέγειν ὡς τὸ ἀνομοιότατον ἐστὶ τῷ ὁμοιοτάτῳ παντὶν ὁμοιότατον, ἔξω τὰ αὐτὰ σοὶ λέγειν καὶ φανούμενά τε νεώτεροι τοῦ δέοντος, καὶ ὁ λόγος ἐκπεσὼν ἡμῶν εἰρήσεται. c. *Phaedr.* T. III, p. 273. D. F.

disquisitione qualibet de summis rerum notionibus (*ideis*), quibus recte secundum classes et species divisas, descendendum esse ad singulas et rerum notiones et res ipsas individuas ita, ut certum inde de quavis judicium ferre possimus. Quam quidem rationem ipse non solum statim in illo ipso dialogo, sed in reliquis etiam v. c. in libris de Republica, Theaeteto; in Phaedro, egregie adhibuit. Quandoquidem vero in singulis his libris systematicum studium philosophi nostri aperte detectum reperimus, haud temere profecto putabimus omnes quoque doctrinas, quae revera et ad universam et ad moralem ejus philosophiam pertineant, etsi non in scriptis tamen in animo ejus arctissimo systematis vinculo conjunctas fuisse.

§. 6.

Jam si illam rationem Platonice comparaverimus cum Christiana, suavem quidem similitudinem, sed majorem discrepantiam reperiemus. Primo quidem oculorum obtutu, in hoc potissimum similis esse videtur Christianae ethices ratio Platonicae, quod continua et exacta systematica forma non induta est. Sed minimi haec similitudo momenti erit, et evanescet fere, si altius spectaverimus. Vidimus enim in Platone, etiamsi universam ethicam systematice non composuerit, tamen in singulis partibus ejus ingenium et studium singulas doctrinas atque opiniones ex altissimis causis repetendi, a notionibus generalibus ad res quaslibet descendendi, et omnino omnia praecepta ethica ratiocinationis vinculis ligandi. Quo tamen ingenio et studio et Christi et Apostolorum praecepta moralia sunt destituta. Quamquam enim occurrant quaedam praecepta ac principia, quae reliqua omnia amplecti videantur, et quibus Christus ipse et Apostoli summum momentum impouerint ¹¹⁾, ta-

11) Matth. XXII, 34-40. Matth. XXIII, 25 sqq. Gal. V, 13-15. Matth. VII, 12. Luc. VI, 31. Matth. V, 48. 1 Petr. 1, 15 sq.

men illa ipsa, quum non uni summo principio fuljungan-
tur, satis indicant, neque Christi neque Apostolorum ani-
mis ethices quoddam systema impressum fuisse. Etenim
quodvis systema unum tantum principium summum habeat
necesse est. Itaque nec Christus, ubi summam legem mor-
alem esse dicit, Dei et proximi amorem ¹²⁾, principium
quoddam ethicum innuere voluit; sed, vi istorum loco-
rum connexum spectamus, primarias legum Mosaicarum
indicare voluit. — Nusquam vero nec singula quaevis
praecepta ad altiores causas reducuntur, nec ex illis ma-
joribus praeceptis ac principiis singula derivantur, sed
omnia tanquam divina oracula ac leges sapientissimi legis-
latoris promulgantur. Quae quidem res, si tam Orienta-
lem cogitemus autorem, nec graecum, quam summum
illud consilium quod Christus animo et dictis expresserit,
spectemus, miros nos amplius habere non potest. Quan-
doquidem enim non Philosophos tantum docere, sed
doctrina sua veriores opiniones sincerioraque principia uni-
verso generi humano impertire voluit, systematica forma
prorsus fuit releganda. Licet enim verum sit, quod Plato
in Menone ¹³⁾ effatur, veras opiniones, nisi scientiae vin-
culis ligatae, causaeque earum perspectae sint, aliquamdiu
tantum animo inhaerere, facile autem deinde expelli: ta-
men haec scientiae et causarum vincula non eandem vim
habent in rudi populi turba, nisi alia quaedam auctoritas
accedat. Ponamus, id quod verum est, vel homines non
eruditos et cogitationi parum aduetos, intelligere posse
causas atque principia virtutum ac officiorum suorum, si
populari quadam ratione ipsis exhibeantur: vix tamen
putandum est, talem popularem ethicae scientiam ac

Matth. VII, 21. XII, 50. Eph. VI, 6; 1. Rom. XII, 2. Joh. 2,
17. Rom. VIII, 2-10. Gal. VI, 8. Phil. IV, 8.

12) Matth. XXII, 34-40. Marc. XII, 28-34. Luc. X, 25-37.

13) T. II, p. 97. E. 98. D.

disciplinam, etiam si verissima ac purissima sit, unquam magnam in universi cujusdam populi sentiendi ac cogitandi rationem vim esse adsequuturam. — Potius divina opus est auctoritate, qua ethica nitatur, ut non quorundam hominum, sed universae gentis animis moribusque vim salubrem atque durantem inferat. Itaque cum religione quoque erit conjungenda. Jam vero Christus gaudens illa divina auctoritate, tanquam divina oracula, divinasque leges, doctrinam suam proferre debeat, si voti consiliique sui compos fieri vellet. Ut igitur philosophica deductione et argumentatione eguisset, tantum abfuit, ut potius illa vim doctrinae suae admodum minuisset, et divina ei forma ademta, humanae scientiae specimen induisset. Dubium enim esse videtur, quod argumentis eget: quod si Jesus argumentis ethicam suam fulcire conatus esset, talem eam nobis tradidisset, de qua adhuc possit dubitari, non eam, quae divinam habuerit originem. Quisquis igitur, Christum vituperare ausit, quod ethicam suam philosophica non sustentaverit ratione, ille ipse laudat Sapientiam ejus atque divinum ingenium. Quibus tamen omnibus nequaquam efficitur, ut nec nobis systematica aut philosophica ratione utendum sit in ethica Christiana tradenda. Immo illa ita est comparata, ut ad veram ipsius mentem percipiendam, singula praecepta systemate jungere necesse sit. Nonnulla enim et Christi et Apostolorum praecepta moralia aut ambigua aut obscura verbis sunt expressa ita, ut nisi aliis locis comparatis et universae ethices vi ac mente perspecta, verum inde sensum elicere nequeas. Praeterea vero nobis, qui ethicam Christianam traditione ac libris accepimus potissimum cavendum est, ne quae ab auctore tanquam divina praecepta prolata sint, ea temere nostra faciamus, et coëco ductu sequamur, sed ex ipsorum vi atque natura cognosci debet, num divino auctore sint digna: quod tamen melius fieri nequit, quam Systemate illis conjunctis et ex altissimis humanae rationis causis repetitis.

S. 7.

Fieri potest, ut aliquis egregiam similitudinem cernat in eare, quod et Christus omnem suam doctrinam a Deo repetat, et Plato interdum non suam mentem, sed divini cujusdam numinis inspirationem exponere videatur. Pertinent huc inprimis ista, quae de Daemone veniunt, cui Socrates omnem suam agendi rationem acceptam referre solet ¹⁴). Sed licet in his miremur Socratis modestiam, et concedamus, vocem aliquam divinam ex eo loquutam esse (quae tamen in quovis melioris indolis homine viget) tamen longe alia res est, quam ratio illa, qua Christus omnia sua praecepta ex Dei mandato protulit ¹⁵). Referenda autem sunt ista ad Socratis notam ironiam, qua quum ipse se nihil scire profiteretur, magniloquos et superbos Sophistas quam maxime premeret. Vix tamen Platoni illius rei aliqua pars tribui potest, qui quum Socratem in dialogis suis accurate fingere vellet, rationem ejus et modum adhibere debebat. Eadem autem res est in Convivio Platonis ¹⁶), ubi Socrates quum de amore loquendi series eum maneret, sermonem non tanquam suum, sed ut a prophetica anu acceptum profert. Nemo profecto in his veram conspiciet narrationem. Sed quum Socratis sermo prae reliquis omnibus ante eum habitis longe emineret, modestiae ejus consentaneum erat, ut tanquam acceptum ab alieno ore eum eloqueretur. Quare Plato egregie atque verissime in illo libro Socratem affinxit. Eodem autem modo dijudicanda sunt, si qua talia in reliquis Platonis libris occurrant, nec ullum praeterea vestigium reperiri potest, unde efficiatur, Platonem de divina quadam philosophiae suae inspiratione cogitasse; immo ubique illam, si rem spectamus, ut ex sua mente

14) Cf. inter alios locos. Apolog. T. I, p. 31. D. sqq.

15) Jo. VII, 16. ἡ ἡμῶν διδασχὴ οὐκ ἔστιν ἐμῇ, ἀλλὰ τοῦ πέμψαντός με, c. VIII, 38. 26. 28.

16) T. III. p. 199 sqq.

profluentem, modesto tamen sui praeceptoris modo, quo omnia ex interloquentium animis elicere videatur, exponit. Uti igitur doctrina Platonis humanae philosophiae, ita Jesu Christi praecepta divinarum legum speciem prae se ferunt.

§. 8.

Major utriusque ethices, si formam spectamus, similitudo cernitur in illo, ut ita dicam, vestimento, quo et Plato et Christus doctrinas plerumque induant. Uterque enim non ubique loquitur oratione proprie intelligenda, sed plerumque imaginibus, fabulis et parabolis veram suam sententiam exprimit. Quae tamen tot tantaque sunt in utroque, ut singula enumerare longum sit. Praeterea vero multa in libris Platoniciis veniunt, quae poetae sint digniora quam philosopho, quo pertinent omnes istae allegoriae quibus tantum abest ut nova menti Philosophi lux accedat, ut potius philosophia obscura, atque dubia fiat. Exemplo est allegoria ista, quam in Phaedro ¹⁷⁾ legimus, si poetam cogites pulcherrima, philosopho autem haud perinde digna. Ingentibus enim imaginationis fictionumque sumtibus, nihil aliud Plato probare voluit, nisi naturam animarum humanarum, et quomodo factum sit, ut divinae ac sempiternae notiones (*Ideae*) illis sese aut intime aut obiter impresserint. In his autem poetam a philosopho separare difficile est factu, et fere ejusmodi res est, ut si formam et ornatum poeticum deimas, pauca tantum reliqua sint, quae pro vera materie haberi queant. — Eadem fere res est in Symposio ubi Diotimam fabulosam atque mythicam Amoris originem narrantem fingit. Hinc factum est, ut oratio Platonis interdum liquida atque plana fluat, interdum vero in altissimos fabularum et fictionum recessus redeat, per quos acerrimus

17) T. III. p. 246 lqq.

tantum oculus veritatem indagare possit. Sed quamquam haec ita se habeant, tamen puto Philosophum ab omni opprobrio esse liberandum. Non enim semper philosophus esse voluit, sed quum nobiles Atheniensium juvenes frigidae philosophiae parum adsuetos allicere vellet, per elegantem illam formam, suam philosophiam maxime illis commendavit, neque timere debuit, ne quae ficta haberi vellet pro vera ipsius mente haberentur. Cogitemus enim Graecos illos, qui singulari Homericarum fabularum flagrant amore, quamquam bene scirent, ex poetarum animis illas esse profectas, nonne illos ad Platoniam doctrinam trahi oportebat, quam eodem nitido et eleganti vestimento indutam novissent? Quo vero, obsecro, jure nos rigidis nostrorum philosophorum systematibus adsueti, condemnabimus philosophum, qui suo nec nostro tempori scribens, eo usus est modo, quo certissime suorum hominum animos sibi se conciliaturum speraret? Licet igitur judicemus, Platonem ut philosophum nimis eleganti orationi indulgisse, tamen nemo illi hanc rem vitio vertet, temporis hominumque habita ratione.

PARS POSTERIOR.

COMPARANTUR ETHICES PLATONICAE AT-
QUE CHRISTIANAE PRINCIPIA.

CAPUT I.

DISQUIRITUR DE SUMMO PRINCIPIO ETHICES
PLATONICAE, ET SI QUID SIMILE EST IN ETHICA
CHRISTIANA.

§. 9.

I. Offendimus in Platonis ethicis doctrinis principium quoddam, quod reliqua ejus praecepta omnia amplecti videatur, et quod ipse summum humanae vitae finem esse voluerit. Illud autem nullum aliud est, nisi illa ὁμοιωσις θεῷ κατὰ τὸ δυνατόν, saepe laudata. Hancce summam illum voluisse legem moralem esse, tam aperte pronunciatum est in Theaeteto ¹⁸⁾, quam manifestius fiet si veram illius legis vim atque naturam exposuerimus.

18) T. I. p. 176. A. B. ἀλλ' οὐτ' ἀπολέσθαι τὰ κακὰ δυνατόν — οὐτ' ἐν θεοῖς αὐτὰ ἰδρύσθαι· τὴν δὲ θνητὴν φύσιν καὶ τόνδε τὸν τόπον περιπολεῖ ἐξ ἀνάγκης· διὸ καὶ πειρᾶσθαι ἐνθάδε ἐκείσε φευγεῖν ὅτι τάχιστα· φυγὴ δὲ ὁμοίωσις θεῷ κατὰ τὸ δυνατόν· ὁμοίωσις δὲ, δίκαιον καὶ ὁσιον μετὰ φρονήσεως γενέσθαι. Cf. Polit. X. p. 613. A. δίκαιον γενέσθαι, καὶ ἐπιτηδεύοντα ἀρετὴν, εἰς ὅσον δυνατόν ἀνθρώπων, ὁμοιοῦσθαι θεῷ. Lib. VI. p. 500. C. D. Legg. IV p. 716. B. C.

II. Ut vero vim atque naturam illius ὁμοιώσεως Θεῷ recte teneamus, necesse est paullo altius e philosophia Platonica eam repetere, ubi simul arcta Platonicae metaphysices atque ethices cohaerentia detegatur. Deus optimus maximus qui rerum omnium et ipsius hominis auctor est, numen est sanctissimum, sapientissimum, et omni ratione praestantissimum ¹⁹⁾. Omnes in illo rerum omnium ideae ²⁰⁾ sive exemplaria secundum quae omnia in his terris sunt effecta atque creata conjuncta latent. Ipse Deus exemplar est, secundum quod universum mundum creavit ²¹⁾. Istarum autem idearum summa omniumque praestantissima est idea boni atque pulchri (τοῦ καλοῦ καὶ ἀγαθοῦ) ²²⁾. Immo Deus ipse est τὸ ἀγαθόν; unum idemque est τὸ θεῖον et τὸ ἀγαθόν ²³⁾. Jam vero Deus, qui ut universum mundum ita homines potissimum voluit esse aut fieri optimos ²⁴⁾, ani-

19) Theaet. I. c. Θεὸς οὐδ' αὐτῇ οὐδαμῶς ἄδικος ἀλλ' ὡς οἶόν τε δικαιοτάτος. Tim. T. III. p. 29. 30. Tim. Locr. T. III. p. 93. 94. f. Legg. X. T. II. p. 886.

20) ἰδέα Platoni semper est, quod pluribus rebus individuīs commune subiacet, ut unam efficiant speciem (εἶδος). Phileb. T. II. p. 25. B. 16. D. Hae ideae sunt aeternae atque immutabiles (τὸ ὄντως ὄν). Itaque ἰδέα τοῦ ἀγαθοῦ, illud est, quod omnibus bonis, naturam boni subdit, abstracta boni notio, quae semper eadem est.

21) v. II. cc. hoc sensu Deus in Philebo dicitur νοῦς βασιλεύς, ut qui rex sit atque possessor omnium idearum s. notionum.]

22) Hanc comparat Soli, quandoquidem illa veritatem praebeat illis, quae intelliguntur, et intelligenti vim ad intelligendum porrigat. Polit. VI. T. II. p. 508 sq. 505. A.

23) Phileb. T. II. p. 28 sqq. In hoc dialogo principium ethices platonicae religiosum constituitur. Nihil enim contendit rebus inesse boni, nisi quod regia ista mens illis immiscuerit. Itaque bonum omne in terris divinum est; quisquis igitur bonum appetit, ille divinum sequitur, et eo ipsi Deo similior fit, cf. etiam Phaedr. T. III. p. 246. E.

24) Tim. T. III. p. 29.

mabus hominum, priusquam corporibus adjunctae essent, et inquinatae, informavit easdem illas, secundum quas mundum creaverat ideas; summamque inprimis iusti ac boni notionem ²⁵). — Sed anima quaevis humana est tripartita, ita ut una reliquarum sit dominatrix atque sola rationalis, altera nobilis quidem ac generosae indolis, quae tamen facile isti rationali parti pareat, seque regi ab illa patiat, tertia vero deformis, bruta et indomita, quae reliquis semper reluctetur ²⁶). Illarum autem sola rationalis pars divinarum idearum compos est ²⁷), ita tamen, ut obscuratae in illa jaceant atque dormitent ²⁸). Jam posteaquam aliquamdiu animae exsisterunt sic comparatae, denique lapsu quodam facto humana corpora induunt et nascuntur ²⁹). Itaque in quovis homine dormitant ideae divinae ³⁰). —

III. His ex altiore Platonis philosophia repetitis, jam nunc vim atque naturam τῆς ὁμοιώσεως θεῶν κατὰ τὸ δυνατόν, accuratius poterimus exhibere atque disponere, plura enim illa complectitur.

1. Primum id agendum est homini, qui Deo appropinquare et similis fieri velit, ut ideas h. e. rerum notiones generales et sempiternas, quae obscuratae animo ejus insitae sunt, ex tenebris in lucem protrahat, sibi quae clariores in

25) Passim in Timaeo, Theaeteto, Phaedone et Phaedro.

26) Videatur allegoria ista, quam in Phaedro legimus, ubi animam duobus equis comparat, quibus auriga moderator impositus est. T. III. p. 246. B. idem argumentum tractatur per totum librum de Rep. et in pluribus locis.

27) Phaedr. T. III. p. 247. C. ἡ γὰρ ἀχρῶμυτός τε καὶ ἀσημάτιστος καὶ ἀφνήης οὐσία οὕτως οὐσα ψυχῆς κυβερνήτη μόνῳ θεῷ ἡγεταί.

28) Phaedr. T. III. p. 246.

29) Hoc ex Phaedro satis liquet v. ll. cc.

30) Phaedo. T. I. p. 73.

dies reddere studeat ³¹). Quum vero idea boni ipsius omnium summa sit ³²). potissimum studium hoc esse debet, ut id quod per se et propter se ipsum bonum est, magis magisque cognoscat et intueatur. Quo enim clarior homini erit ista notio boni ipsius, eo magis similis est Deo qui ipse bonum est, et clarissimam boni notionem habet. Itaque homo qui Deo proximus esse cupiat, quantum fieri potest, a rebus mutationi et vicissitudinibus obnoxiiis animum abstrahet, et illi quod in quaque re solidum est et aeternum advertet. Vitam aget contemplativam, nihil curans rerum externarum impetum ita, ut perpetuo mori videatur ³³).

2. Quisquis autem id quod per se bonum est recte cognovit et intuitus est, ille non potest quin agendo et sentiendo quoque bonum appetat et ipse bonus sit ³⁴). Quum vero sola ratio (τὸ λογιστικόν) divinarum idearum compos sit ³⁵), ideoque sit ea animae pars, quae revera divina dici queat ³⁶), atque superior illis quae homo cum

31) Polit. VI. p. 485. C. D. p. 490. VII. p. 519. C. D. Quisquis verus philosophus esse velit concumbere debet cum τῷ ὅντως ὄντι ita ut intelligentiam et veritatem gignat, verum cognoscat, vero vivat et alatur; omne falsum odio persequatur, nec acquiescat in opinionibus (δεξιάζειν). Phaedr. p. 247. Sympol. p. 210. cf. de Rep. VII. p. 517. B. C.

32) Polit. VI. p. 505. A. B ἡ τοῦ ἀγαθοῦ ἰδέα μέγιστον μάθημα. ἡ καὶ δίκαια καὶ τὰλλα προεχρησάμενα χρήσιμα καὶ ὠφέλιμα γίγνεται.

33) Phaed. T. I. p. 66. E.

34) Theaet. T. I. p. 176. καὶ οὐκ ἔστιν αὐτῷ (τῷ Θεῷ) ὁμοίωτερον οὐδὲν ἢ ὃς αὐτῷ ἡμῶν αὐτῷ γένηται ὅτι δικαιοτάτος Legg. T. II. p. 716. δῆλον δὲ τοῦτό γε ὡς τῶν ξυνακολουθήτοντων ἐσόμενον τῷ Θεῷ, δεῖ διανοηθῆναι πάντα ἄνδρα.

35) v. I. c. sub. 28.

36) Phaed. T. I. p. 65. D. E. Politic. T. II. p. 285, E. 286.

bestiis communia habet ³⁷), illam necesse est liberam esse et summum tenere imperium, ut quid bonum verumque sit, nulla re impedita possit cognoscere. Itaque bonus quisque rationem ab omni aut affectuum aut libidinum impetu liberabit, solaque ratione se duci patietur ³⁸). Qua quidem in re divino numini simillimus erit, quod sola ratione in agendo ducitur. Neque vero hinc efficitur, affectus et libidines prorsus esse opprimendas et quasi necandas, tunc enim homo suam ipsius naturam everteret, et quod fieri nequit tentaret, sed κατὰ τὸ δύνατον petenda est divini numinis similitudo, idque agendum ut ne ratio e reliquis animae partibus detrimentum capiat vel in agendo prohibeatur ³⁹). Quisquis vero illud consequutus fuerit, vera ille fruatur iustitia (δικαιοσύνη) h. e. virtute, quae quidem a iusto rationis imperio pendet ⁴⁰).

Quodsi summum Platonis principium morale binis verbis liceat complecti, sic fere erit exprimendum: Id age, ut Deo quantum possis similis fias, dum et veri bonique notionem purissimam (Φρόνησις), eique obtemperans summam in agendo virtutem tibi comparas (δικαιοσύνην καὶ ὁσιότητα). Illud ip-

37) Polit. IX. p. 589. E. 590. C. D. Criton. T. I. p. 47. E. 48. A. Alcib. I. T. II. p. 183. B. C. ἔχομεν οὖν εἰπεῖν ὅ, τι ἐστὶ τῆς ψυχῆς θεϊότερον, ἢ τοῦτο περὶ ὃ τὸ εἶδέναι τε καὶ φρονεῖν; — οὐκ ἔχομεν. — τῷ θείῳ ἄρα τοῦτο εἰκέν αὐτοῖς κ. τ. λ. Phaed. p. 79. D. E. 80. A.

38) Polit. L. IV. IX. X. pluribus in locis. Legg. I. p. 644. E. IX. p. 875. C. D. Apolog. p. 28. B. D. p. 32. D. Gorg. p. 482. B. C. et alibi.

39) Animum vel potius rationem hac in vita nondum ab omni molestia liberari posse probatur et in Theaet. l. c. et in Phaedore.

40) Inter plures locos cf. Polit. IV. p. 442. ἀλλὰ μὲν δὴ δίκαιος γέ, ὡς πολλάκις λέγομεν, τοῦτω καὶ οὕτως ἐσται. suppl. ex antecedd. ὅταν τὸ, τε ἄρχον καὶ τῷ ἀρχομένῳ ὁμοδοξῶσιν, ὡς δεῖν ἄρχειν τὸ λογιστικόν, καὶ μὴ στασιάζοντων αὐτῶ κ. τ. λ.

sum, si aliis verbis exprefferis, hoc erit: Sequere rationem solam, quam verissima tunc boni notionem imbueris.

IV. Verum enimvero oritur quaestio, qua ratione duo ista momenta summae similitudinis Dei inter se invicem posita esse Plato voluerit. Ex quibusdam enim locis praevidetur, eam tantum ob causam petendam esse homini purissimam veri atque boni notionem, ut in agendo et vita certum adhibere possit iudicium, quo id quod vere bonum est semper eligat, neque falsa opinione in errore adductus in injustam improbamque agendi rationem incidat. In Phaedro ⁴¹⁾ enim, si poeticum ornatum reciderimus, contenditur, illum, qui divinas ideas contemplari et penitus cognoscere studuerit, quamvis ceteroquin vitam honestam egerit, non esse perfectissimum, atque semper periculum subire, ne a sensibus et deterioribus animae partibus abripiatur in scelera, quum ratio ejus nondum satis certum firmumque imperium occupaverit. Itaque ex his conficitur, ex sententia Platonis, contemplationem idearum veramque notionem homini parare certum rationis imperium. Sed clarius adhuc et sine poetica obscuritate eadem profatus est in libro de Republica ⁴²⁾, nam: quisquis, inquit, sana mente quidquam vel privatim vel publice acturus, est ideam boni (τὴν τοῦ ἀγαθοῦ ἰδεαν) illum perspexisse necesse est. — Praeterea in Phaedone ⁴³⁾ dicit Φρόνησιν esse omnium virtutum fontem; neque veram cogitari posse hominis virtu-

41) T. III. p. 256. 257.

42) T. II. L. VII. p. 517. C. καὶ ὅτι δεῖ ταύτην (τὴν τοῦ ἀγαθοῦ ἰδεαν) ἰδεῖν τὸν μέλλοντα ἐμφρόνως πράξειν, ἢ ἰδίᾳ ἢ δημοσίᾳ cf. quae sequuntur.

43) T. I. p. 69. B. ἀλλ' ἢ ἐκεῖνο μόνον τὸ νόμισμα ὀρθόν, ἀντὶ οὗ δεῖ πάντα ταῦτα καταλλάττεσθαι, Φρόνησις, καὶ τούτου μὲν πάντα καὶ μετὰ τούτου ἀνούμενά τε καὶ πιπρασκόμενα τῶ ὄντι ἦ, καὶ ἀνδρεία, καὶ σωφροσύνη, καὶ συλλήβδην ἀληθείας ἀρετὴ ἢ μετὰ Φρονήσεως.

tem, nisi ex illa profecta sit. ὑπονομία vero Platoni nihil est aliud, nisi scientia veri atque boni, et idearum cognitio. Nec alio loco opus est, quo evincamus, Platonem eam ob causam in idearum intuitione tantum posuisse momentum, ut ne homines falsis opinionibus et judiciis adducti aut injuste aut improbe agant. Nihilo minus autem multi alii existant loci, unde jure colligi possit, per se et propter se quoque petendas esse istas ideas, nulla habita ratione, quam vim in actiones humanas exercent. Quae quidem sententia aperte continetur Phaedone ⁴⁴), ubi hanc ob causam, dicit, philosopho non metuendam, immo vehementer optandam esse mortem, quas animā ab corpore sejunctā, id, quod per se bonum verumque sit, omni claritate nec ullis erroribus involutus cognoscere et intueri possit, cujus quidem rei verus philosophus jam in hac vita cupidissimus esse debeat. Profecto vero ita ratiocinari non potuisset, nisi ipsi idearum cognitioni per se summum adjudicasset pretium. In Phaedro ⁴⁵) praeterea profitetur, animam philosophi propterea entusiasmo quodam (μανία) trahi ad intuitionem idearum, quoniam haec videat esse simulacra esse divini numinis, quod ante quam corpori immissa fuerit, intuita sit; nec igitur eam ob causam ut vitam et actiones suas per illam moderetur. Denique vero ex pulcherrima quoque ista imagine, quae in Politia ⁴⁶) legitur, ubi hominis obcaecatam parumque excultam rationem comparat homini in carcere victo ita, ut pulcherrimarum rerum umbras tantum conspiciat, nec res ipsas contemplari possit, efficitur ipsas rerum ideas, ipsamque veritatem per se pretium habere, eamque ob causam philosopho appetendas sese exhibere. Attamen in sequentibus ipse Plato istius cognitionis vim, quam exferat in actiones hominum exponit. —

44) T. I. p. 65 sqq.

46) VII. init. p. 514 sqq.

45) T. III. p. 249 sq.

His omnibus autem compositis, non temere feremus iudicium hoc: Platonem idearum cognitionem expostulavisse, tum quia per se ista cognitione homo divino numini simillimus fiat, tum quia ea destitutus, certam rectamque vitam rationem nunquam reperire, nec agendo Deo appropinquare possit.

V. Jam vero, ne temerarium de Platone feratur iudicium, bene tenenda sunt, quae de diversa hominum indole praedicat. Non omnes, inquit, mortales summam praestantiam in hac vita adipisci possunt, sed diversa sunt hominum ingenia, et pauca ad veram philosophiam apta 47). Hinc vero aliquis concluderet Platonem tale ethices suae principium posuisse, quod, quum illud philosophus tantum assequi possit, reliquis hominibus inutile sit. Quod tamen injustum est iudicium. Quando enim Phaedrum 48) legerimus, et ex allegoricis narrationibus veram mentem Platonis enucleaverimus, haec fere est philosophi nostri sententia; Animae, quae humana corpora induunt non eadem gaudent conditione. Quamquam enim nulla earum omnino integra sit, et ea qua esse debet praestantia, sed omnes pro lapsis daemonibus haberi possint, tamen depravationis gradus existunt, prouti aut τὸ λογιστικόν, aut τὸ θυμικόν aut τὸ ἐπιθυμητικόν majorem vel minorem assequuntur est potestatem. Hinc explicantur diversi hominum impetus, quibus ad diversa vitae genera naturaliter feruntur. Quisquis enim jam natura gaudet eximio rationis imperio, ille trahitur ad bonum verumque ipsum per se intuendum, et jam in hac vita ad summam praestantiam emergere potest. Hujus autem generis non multi in his terris reperiuntur. Reliqui vero,

47) Polit. VI, p. 491. A. τόδε μὲν οὖν, οἶμαι, πᾶς ἡμῖν ὁμολογήσαι τοιαύτην φύσιν, καὶ ταῦτα ἔχουσιν, ὅσα προσετάξαμεν νῦν δὴ, εἰ τελείως μέλλει φιλόσοφος γενέσθαι, ὀλίγῃς ἐν ἀνθρώποις φύεσθαι καὶ ὀλίγῃς.

48) T. III. p. 246. 199.

etiam si non statim in hac vita summam assequi possint praestantiam et pristinam integritatem, tamen si modo rationi semper imperium suum vindicare, deoque similes esse studuerint, paulatim sequentibus generationibus summum perfectionis fastigium ascendere possunt; quod vero si minus curaverint, sensim in inferiorem gradum delabentur, et adeo bestiarum denique corpora induunt. Itaque cuique homini semper et ubique pro viribus appetenda est Dei similitudo, ut quondam summam praestantiam recuperet, quam adeptus cum Diis in aeternum versabitur. Quandoquidem vero Plato ostendit, qua in re summa Dei similitudo posita sit, simul viam, qua ad illam proficiscendam sit, demonstravit. Injuste igitur adversus Platonem agit, nec omnino eum intellexit, si quis contendat solis philosophis illum ethicam scripsisse, et exposuisse, quod plurimorum vires excedat. Tollitur enim illud iudicium, quandoquidem philosophos noster relictus animarum post mortem in humana corpora statuit 49).

VI. Jam hoc modo summo platonicae ethices principio exposito, satisque, credo, probata, vix quaeri poterit, an Plato revera Philosophiae moralis systema habuerit. Vidimus enim Platonem revera summum agendi principium homini proposuisse, illudque non esse praecipuum quoddam praecipuum, sed eodem sensu, quo nostrae aetatis philosophi (si unum Kant exceperis) suis moralis philosophiae systematibus principia imponere solent. Vidimus praeterea, omnia, quae Plato in ethica sua praecipiat, ad illud summum principium recurrere, atque optime reduci posse, etiam si ipse hoc non ubique fecerit. Vidimus denique tantam tam singulorum praeceptorum internam, quam to-

49) Haec omnia singulis locis probari nequeunt, sed progrediuntur ex illa oratione Socratis de amore habita, quam in Phaedro L. c. legimus, secunda.

tius philosophiae moralis cum metaphysica cohaerentiam, ut vix unum locum ignorare non possis, ne reliqua omnia tibi obscura et vix intelligenda maneant. Quibus si addamus, quae supra de forma Platonicae philosophiae monuimus, philosophum nostrum systema, quamvis forma ubique non expressum, habuisse, eosque, qui illud negant, veram totius philosophiae vim parum perspexisse, dubium amplius esse nequit.

§. 10.

Reliquum est, ut jam principio ethices Platonicae exposito videamus, numquid tale in ethica Christiana occurrat, et comparisonem instituéamus.

I. Neque Christum neque Apostolos in ánimo habuisse, ethices aut systema tradere aut summum principium exhibere, quum supra jam dictum est, tum ita notum et ab omnibus probatum, ut argumentis non amplius opus sit. Quamvis igitur difficile sit factu, ex praeceptis moralibus N. T., saepe obscuris nec satis certis limitibus circumscriptis, quae dispersa et a reliquis abrupta jaceant, et modo tempora locosque spectent, modo sibi invicem contraria esse videantur, componere systema omnibus partibus cohaerens, et uni summo principio subjectum, tamen hoc fieri non solum potest, sed etiam saepe factum est. Etenim una eademque vis inest omnibus istis praeceptis, et ad unum summum finem spectant omnia, ad summam praestantiam moralem, quae quidem nulla alia est, nisi Dei similitudo, quantumvis illam viribus humanis assequi possis. Hoc enim negari nequit, si quis omnia ethices christianae praecepta contulerit, et in unum conjunxerit, summam praestantiam moralem, Deique similitudinem unum idemque esse, hominemque eodem gradu Deo appropinquare, quo praestantior factus sit. Itaque fieri potest, ut in illa ipsa sententia atque doctrina summum principium ethices christianae positum sit, id quod revera nonnulli

theologorum nostrorum putaverunt: quae tamen sententia utrum rata sit necne, paulo infra in ipsa comparatione videbimus.

II. Plurimi eorum, qui de egregia Platonicae atque Christianae ethices similitudine loquuntur, summum fere ponunt momentum in ea re, quod in utraque, summa hominis praestantia moralis ponatur in similitudine cum Deo. Neque hoc mirum quemquam habere potest, quum revera nulla alia aut ante Platonem, aut post eum, philosophorum schola sententiam istam exprefferit. Sed si paullo altius istam tantam similitudinem investigaverimus, mirari illam desinentes, eas potius admirabimur de Deo sublimes notiones, quibus amice Christus et Plato conspiraverunt. Quandoquidem enim Plato summum numen non tantum omnipotens, mundum regens, sapientissimum et omnium rerum gaudens scientia posuit, sed summa quoque morali praestantia praeditum ita, ut ipsum bonum et cuiusvis boni in his terris exemplar primaeque causa fuerit, vix aliter fieri potuit, quam ut summam hominis praestantiam in summi istius boni, quod ipsum Deus esset, similitudine poneret. Quisquis igitur melior fiet et praestantior, illum Deo appropinquantem dici, positus illis, necesse est. Eadem autem res est in Christiana doctrina, ubi itidem Deus tanquam numen quaque re praestantissimum, omnisque boni in his terris, ipsiusque legis moralis, quae regnet in hominibus causa et auctor, repraesentatur. Ponenda igitur est similitudo quae inter utramque ethicam intercedit, in illo ipso religioso principio, secundum quod utriusque auctor, Deum atque summum bonum unum idemque fecit.

III. Quamvis vero illa tanta sit similitudo, minor tamen evadit ea, quam primo obtutu in sententia inde profluente, affectandam esse cuique homini Dei similitudinem, offendimus, simulac penitus sententiam ipsam exploraverimus.

1. Similitudo Dei Christianae ethices principium non eodem sensu est ac Platonicae. Quodvis enim summum prin-

cipium morale ita debet esse comparatum, ut simul causam moventem in se habeat inclusam. Haec autem causa Platonis summo principio simul est inclusa, Christianae legi, qua jubemur Deo similes fieri, non ita. Platoni enim latet causa ista simul in natura veri ac boni. Quisquis, inquit, summam boni ideam cognoverit et intuitus fuerit, ille non potest, quin illam omni studio appetat, reliqua omnibus relictis ⁵⁰). Quamvis autem ipse summum Deum faciat auctorem et exemplar, illius boni ideae, non tamen illa appetenda est et cognoscenda, quia Deus iusserit, sed sui ipsius causa ⁵¹). Bonum enim nihil est ea de causa, quod Deus illud voluit esse bonum, sed ipse Deus bonus est, quoniam ideam boni in se habet ⁵²). Boni enim idea, ut reliquae ideae sunt sempiternae, nec ab ipso Deo mutari possunt ⁵³). Bonum habet summam quandam pul-

50) Polit. VII. p. 514 lqq. Per totam pulcherrimam illam imaginem hominis in carcere vincti, cui primum umbras tantum pulcherrimarum rerum, et deinde res ipsas conspiciere licuerit, aperte docetur, ipsis ideis inunctam esse summam et praesentiam et pulchritudinem. Quam si quis cognoverit sponte illo trahatur. cf. Phileb. T. II. p. 20. D. Sympos. T. III. p. 211.

51) Eutyphr. T. I. p. 10. 11. ἀρά τὸ ὁσίον, ὅτι ὁσίον ἐστι φιλεῖται ὑπὸ τῶν θεῶν· ἢ ὅτι φιλεῖται, ὁσίον ἐστι; p. 20. ὅτι ὁμολογούμεν τὸ μὲν ὁσίον διὰ τοῦτο φιλεῖσθαι, ὅτι ὁσίον ἐστίν· ἀλλ' οὐ διότι φιλεῖται, ὁσίον εἶναι.

52) Phaedr. T. III. p. 247. D. ἵπτε Deus dicitur intueri τὸ ὄντως ὄν, i. ipsas ideas aeternas. ἄτ' οὖν θεοῦ διαίτεια καὶ ἐπιστήμη ἀκηράτω στρεφόμενη, καὶ ἀπάσης ψυχῆς, ὅταν αὖ μέλλῃ τὸ προσήκον δέξασθαι, ἰδοῦσα διὰ χρόνου τὸ ὄν, ἀγαπᾷ τε καὶ θεωροῦσα τὰ λήθῃ πρέφεται, καὶ εὐπαθεῖ, ἕως αὖ νύκτωρ κ. τ. λ. In Timaeo T. III. p. 29 30. Deus dicitur universo mundo informasse ideas: quarum intuitionem ipse gaudeat, quia utpote bonus nulla invidia tangatur. Itaque illae ideae non eo bonae sunt, quod a Deo profisciscantur, sed per se et propter se bonae habentur.

53) Aeternitas et immutabilis ratio idearum saepe docetur in Timaeo, Theaeteto, Philebo, Politia, Phaedro. cet.

chritudinem ⁵⁴), arctissime cum eo conjunctam, quam non inde accepit, quod Deus illud bonum esse voluerit. Itaque si quis boni ideam vidit, simul ad illam trahitur, non quia intellexit, hanc ideam a Deo sibi insitam esse, sed quia perspexit illam pulcherrimam esse sua ipsius natura. Quamquam igitur solus vere bonus Dei benevolentia gaudeat (nam similis placet ⁵⁵), tamen homo non ideo erit bonus, ut Deum gratum sibi reddat, sed quia cognovit ideam boni esse per se et propter se ipsam pulcherrimam. — Jam vero vix opus est, ut ab istis ethicam christianam aliquantum discedere probemus. Secundum illam enim omne bonum est quod cum Dei voluntate consentit, et eam solam ob causam, quod cum illa consentit. Deus auctor est legis moralis, quae viget in nobis, et ideo huic obediendum est, quoniam Deus ipse ejus auctor est. Quamvis igitur minime negetur, bonum quodvis per se pretium habere, tamen illud ideo faciendum est, quia Deus iussit. Itaque summa causa quae hominem ad virtutem impellere debeat, non posita est in ipsa illa lege τῆς ὁμοιώσεως τῷ Θεῷ, sed extrinsecus adfertur ex voluntate Dei qui est et pater et creator nostrum omnium ⁵⁶). Hinc virtus est obsequium Deo prae-

54) Ubique Platonem τὸ καλὸν κἀγαθὸν junxisse, notissimum est. Phileb. T. I. p. 64. E. καταπέφυγεν ἡμᾶς ἡ τἀγαθοῦ δύναις εἰς τὴν τοῦ καλοῦ φύσιν μετρίότης γὰρ καὶ ἑυμετρία, κίλλος δὲ πον καὶ ἀρετὴ πανταχοῦ συμβαίνει γίνεσθαι. Potissimum in Symposio Plato proficitur, ethicam ideam summam esse pulchritudinem, nec quicquam pulchrum esse, quod illius particeps sit. p. 201 A. B. 205. A. 211. A. B.

55) Polit. L. I. p. 352. καὶ θεοῖς ἄρα ἐχθρὸς ἔσται ὁ ἄδικος, ὁ δὲ δίκαιος φίλος. — Legg. L. IV. p. 716. C. D. καὶ κατὰ τοῦτον δὴ τὸν λόγον, ὁ μὲν σώφρων ἡμῶν, θεῷ φίλος (ὁμοιος γὰρ)· ὁ δὲ μὴ σώφρων, ἀνέμοιος τε καὶ διάφορος, καὶ ἄδικος.

56) Vide inter innumeros locos. Matth. VII, 21. XII, 50. Eph. VI, 6. 1 TheII. IV, 3. V, 18. 1 Joh. II, 17. Rom. XII, 2.

stitum, et officium; quae quidem notio in Platonis ethica prorsus evanuit. Plato enim naturam boni extulit supra voluntatem Dei, Christus vero illam huic subjecit.

2. Praeterea vero alterum quam maximum discrimen hoc est, quod Platonis ὁμοιωσις τῷ Θεῷ longe plura complectatur, quam lex ista christiana, quae Deo similem fieri hominem jubet. Neque enim Christus neque Apostoli hac lege aliud quiddam intellexerunt, nisi animi eruditionem virtutisque perfectionem, qua quidem omnis moralis hominis praestantia conficitur. In fine istius orationis, quam Christus de monte ad populum Judaeum habuisse traditur ab Evangelista, posteaquam plurima eaque pulcherrima atque gravissima dedit vitae praecepta, omnia illa complectitur hac sententia ⁵⁷): εἰσεσθε οὐτ' ὑμεῖς τέλειοι, ὥς περ ὁ πατὴρ ὑμῶν ἐν τοῖς οὐρανοῖς τέλειός ἐστι. Patet igitur illam perfectionem atque similitudinem pertinere tantum ad animi morumque emendationem. Eodem autem modo Apostoli pluribus in locis singulas virtutes, amorem, misericordiam aliasque commendant tanquam aemulationem divini exemplaris ⁵⁸). Sed nullibi aliquod cernitur vestigium, unde colligi possit, in cognitione veri ac boni in quaque re, Christianam quoque ethicam posuisse similitudinem Dei. Quamquam negari nequit cognitionem illam ad virtutem summam necessariam esse, et quum ipsa religio Christiana summam exigit virtutem, simul istam expostulari, tamen nullo loco N. T. dictum est, cognitionem veri i. e. ingenii et iudicii culturam eam ob causam appetendam esse, ut hac ipsa re Deo similes fiamus. E contrario autem Plato idearum intuitionem, quae eadem est illa summa rationis et iudicii perfectio, non solum a praestantissimo quoque expostulat, sed in ea ipsa summum τῆς ὁμοιώσεως

57) Matth. V, 48.

58) Luc. VI, 35 sq. 1 Petr. I, 16 sq. III, 13. Eph. V, 1 sq. IV, 51 sq. 1 Joh. IV, 7. 8.

τῷ Θεῷ momentum ponit, nec solum, uti vidimūs, ideo, ut quod neglecta illa nulla vera virtus cogitari possit, sed quod ideae illae per se et propter se potissimum intuendae ac appetendae sint. Qua quidem in re si verum spectemus, laudandus est christianae ethices auctor; nam Deo ea tantum appropinquare possumus ratione, quatenus auctor est legis moralis vobis insitae, bonique verae notiones acquirendae sunt homini, non ut in his Deo similis fiat, sed ut ad veram virtutem eniti queat. Nihilominus autem reliquam ingenii et iudicii culturam christiana ethica minime vetat, sed vehementer efflagitat, non tamen eam ad similitudinem cum Deo reducit, sed ad legem divinam, qua iustus est homo, ut quod sibi mandatum sit, illud quantum possit, colat et usu adhibeat. Non enim omnibus eadem atque paria sunt concredita⁵⁹⁾. Itaque Plato hominis universam praestantiam, Christiana autem doctrina moralem tantum conditionem ad similitudinem Dei refert.

3. Denique vero restat in his discrimen, quod omnium summum momenti est. Quamvis enim Plato omnibus hominibus viam monstraverit ad summam praestantiam assequendam, eaque quemque hominem iucedere iusserit, tamen simul omnibus eundem posuit finem, quem priusquam homo adeptus sit, summae atque aeternae felicitatis compos esse nequeat. Jam vero ipse illum finem ab ullo posse attingi negat, nisi naturaliter ea sit animi conditione qua ad divinarum idearum perspicientiam ducatur, quod tamen paucis hominibus, solisque philosophis contigerit. Quum igitur pauci tantum homines jam in hac vita summum illum finem praestantiae assequi possint, reliquis omnibus pluribus opus est vitis in hac terra degendis, priusquam ad eam quam omnes speramus vitam felicitatemque aeternam pervenire possint. Ex hac igitur doctrina, quisquis sibi conscius est,

59) Matth, XXV, 14-30.

se philosophum ex mente Platonis nondum esse factum, quamvis ceteroquin probissimus homo, ille aeternam felicitatem post mortem sperare nequit, sed timeat necesse est, ne anima sua rursus corpori humano immissa, molestam vitam agere cogatur. Quam longe vero ab his distant, quae Christiana religio praecipit! Praestantissimus enim est, inquit, quisquis iis, quae a Deo acceperit optime usus, summum studium in assequenda virtute adhibuerit. Dum igitur Platonis summum principium homini, ut ita dicam, objectivam praestantiam assequendam praecipit, Christiana religio summa studia humana in subjectiva praestantia ponit ⁶⁰). Quicumque vero hanc subjectivam praestantiam assequuti fuerint, id quod a nemine fieri non potest, illi eodem jure omnes aeternam post mortem felicitatem expectare possunt.

§. 10.

IV. Jam his omnibus expositis, similitudinem istam, quae primo oblutu inter Platoniam et Christianam *ὁμοιωσιν τῷ Θεῷ* locum habere videtur, tantam habere definemus, quanta plerumque hucusque facta est. Omnis enim similitudo manet in eo, quod Plato et Christus easdem fere Dei sanctissimi et optimi notiones habuerunt. Hinc autem necessario modo efficitur, ut si quis opinari ausus sit, Chri-

60) Etiam si haec uno loco probari nequeant, tamen si totam doctrinae christianae vim perspexeris, satis in propatulo posita esse cernes. Etenim nullo in loco aut Christus aut Apostoli quandam praestantiam objectivam homini sectandam proponunt, sed illum praedicant beatum, qui animi sinceritate et integritate gaudeat. Math. V, 8. Non opus est alta doctrina et eruditione ad moralem praestantiam adsequendam. Math. V, 3. Itaque omnes homines naturaliter sunt ita comparati, ut moralem praestantiam sibi comparare possint. Optimus est, quisquis ea quae divinitus ipsi sunt concedita optime adhibuit Luc. XIX, 12 sq. cui multa sunt concedita, ab illo multa exiguntur, Luc. XII, 48.

sum, quum Platonis summum principium morale noverit, illud in suam ethicam inde transtulisse, simul contendat, Christum suas de Deo notiones puriores accepisse. Sed quis unquam talia profari audebit!

CAPUT II.

INQUIRITUR IN VIRTUTIS TAM PLATONICAE QUAM CHRISTIANAE NATURAM.

§. 12.

I. Universam hominis virtutem sive rectam agendi rationem Plato voce δικαιοσύνη⁶¹⁾ complexus est. Posita est haecce δικαιοσύνη in justa ratione et harmonia singulorum animae partium. Tres enim, uti vidimus, ex sententia Platonis, sunt animae partes, τὸ λογιστικόν, τὸ θυμικόν et τὸ ἐπιθυμητικόν. Quorum quidem primum complectitur rationem, sive eam partem animae, quam homo

61) τῇ δικαιοσύνῃ Plato modo latiore modo strictiore sensum adjungit. Ex constanti tamen usu hujus vocis in Politia, ea intelligitur hominis ratio, qua cuique parti illius suum agendum tribuitur. Polit. IV. T. II. p. 433. A. ὅτι τὸ τὰ αὐτοῦ πράττειν, — καὶ μὴ πολυπραγμονεῖν, δικαιοσύνη ἐστί. ibid. p. 441. D. μνημονευτέον ἄρα ἡμῖν ὅτι καὶ ἡμῶν ἕκαστος, ὅταν τὰ αὐτοῦ ἐν αὐτῷ πράττῃ, δίκαιός τε ἔσται καὶ τὰ αὐτοῦ πράττων. — ib. p. 443. C. D. τὸ δὲ γε ἀληθές, τοιοῦτον μὲν τι ἦν, — ἡ δικαιοσύνη, ἀλλ' οὐ περὶ τῇ ἐξω πράξει τῶν αὐτοῦ, ἀλλὰ περὶ τὴν ἐντὸς ὡς ἀληθῶς, περὶ ἑαυτὸν καὶ τὰ ἑαυτοῦ, μὴ ἐκείντα τὰ ἀλλότρια πράττειν ἕκαστος ἐν αὐτῷ, μηδὲ πολυπραγμονεῖν πρὸς ἄλλα τὰ ἐν τῇ ψυχῇ γένη· ἀλλὰ τῷ ὄντι τὰ οἰκεία εὖ θαμενον, καὶ ἄρξαντα αὐτὸν αὐτοῦ — καὶ ξυναρμωσαντα τρία ὄντα, ὥς περ ὄρους τρεῖς ἀρμονίας, κ. τ. λ.

cum Deo communem habet, cui insunt veri bonique ideae, et quae sola cogitare atque de rebus iudicium ferre potest. Alterum vero, τὸ θυμικόν quod interdum etiam audit τὸ θυμοειδές τὸ φιλονεϊκόν, nihil aliud fuisse videtur Platoni, nisi fortis hominis voluntas, sive impetus agendi, cuius quidem causam potissimam ponit modo in honoris studio, modo in animi concitatione (ὄργη), et ardore ⁶²). Tertium denique τὸ ἐπιθυμητικόν amplectitur libidines omnes et appetitum, cuius stimuli potissimum corpori insunt ⁶³). Jam vero iusta horum omnium ratio haec est, ut τὸ λογιστικόν, utpote quod et divinam imaginem referat, et veri solum compos est, hominemque a bestiis distinguit ⁶⁴), summum semper teneat locum, nec a reliquorum ullo aut subjugetur aut prohibeatur, τὸ θυμικόν vero isti praesto adsit, nec sine illo agat quidquam ⁶⁵), τὸ ἐπιθυμητικόν denique prorsus τῷ λογιστικῷ subjectum sit, seque ab eo contineri patiat. Quo autem in homine haec ratio valet, ille recte iustus h. e. virtute praeditus vocatur. Tunc adest vera animae harmonia, et οἰκαιοπραγία, ubi quodvis in suo loco suum agit, nec quod alius est sibi vindicat

62) v. descriptionem hujus partis animae Polit. IV. p. 439. E. -- 441 B.

63) Amplam de his tribus animae partibus disquisitionem v. Polit. IV. p. 436. C. - 441 B. cf. Phaedr. T. III. p. 242. B - 246.

64) v. ll. cc. notis 36. 37. 38.

65) Polit. IV. p. 441. E. οὐκοῦν τῷ μὲν λογιστικῷ ἄρχειν προσήκει, σοφῷ ὄντι, καὶ ἔχοντι τὴν ὑπὲρ πάντας τῆς ψυχῆς προμήθειαν; τῷ δὲ θυμοειδῇ ὑπάρχει εἶναι, καὶ ξυμμάχῳ τούτου; — πανύγε. — καὶ τούτω δὴ — προσθήσεται το ἐπιθυμητικόν, ὃ δὴ πλείστον τῆς ψυχῆς ἐν ἐκάστῳ ἐστὶ, καὶ χρημάτων φύσει ἀπληστότατον· ὃ τηρήσεται, μὴ τῷ πιμπλάσθαι τῶν περὶ τὸ σῶμα κλυομένων ἡδονῶν. πολὺ καὶ ἰσχυρὸν γιγνόμενον, οὐ τὰ αὐτοῦ πράττει, ἀλλὰ καταδουλώσασθαι καὶ ἄρχειν ἐπιχειρήσῃ ὣν οὐ προσήκον αὐτῷ γε ἦν, καὶ ξύμπαντα τὸν βίον πάντων ἀναιρέσει.

agendum ⁶⁶). Haec vero necessaria est conditio omnis virtutis; nec esse potest aut Prudentia, aut Fortitudo aut Temperantia sine illa iustitia.

II. Prudentia (σοφία, φρόνησις, νούς) est plena rationis libertas in agendo, sive summum rationis imperium in omnes reliquas hominis partes. Itaque illa nullo modo existere potest, si aut ira aut libidines super rationem excreverint. In ratione vero posita est scientia bonorum atque malorum, et eorum quae aut facienda sint aut fugienda. Prudentia igitur est libera cognitio et scientia boni atque mali, quae minime impeditur vel corrumpitur aut sensuum aut libidinum impetu aut ira aut honoris studio ⁶⁷). Fortitudo autem vera est ea, quae illam de rebus formidandis sentiendi rationem, quam ratio praescripsit, nunquam aut dolore aut voluptate aut cupiditatibus aut timore mutari et objici patiatur ⁶⁸). Jamque haec in τῷ θυμοειδέϊ posita est, itaque illud altiores quam τὸ ἐπιθυμητικόν locum accupet, nec se vinci ab illo patiatur necesse est. Rationi tamen obediat, ut quae sola ipsi suppeditat τὴν ὀρθὴν δόξαν περὶ τῶν δεινῶν. Immo rationi praesto adsit in dominandis cupiditatibus. Temperantia denique (σωφροσύνη) posita est in vero concentu libidinum cum ratione, ita ut illas prorsus et semper sequantur rationem. Quare

66) Polit. IV. p. 434. B. C. Hinc iustitia comparatur cum sanitate, ἀδίκη cum morbo corporis. p. 444. C. D. E.

67) Polit. IV. p. 442. C. σοφὸν δὲ (ἕνα ἕκαστον καλοῦμεν) ἐκείνῳ τῷ μικρῷ μέρει τῷ ὃ ἤρχε τ' ἐν αὐτῷ, καὶ ταῦτα παρήγγελεν ἔχον αὐτὸ κακίῳ ἐπιστήμῃ τὴν τοῦ θυμοειδέος ἐκαστῷ τε καὶ ὅλῳ τῷ κοινῷ σφῶν αὐτῶν τριῶν ὄντων. cf. de Legg. n. q. 1. φρόνησις, ἐπιστήμη ἀγαθῶν καὶ κακῶν — διάθεσις, κατ' ἣν κρίνομεν τί πρακτέον καὶ τί οὐ πρακτέον.

68) ἀνδρεῖον δὲ, οἷμαι, τοῦτ' αὖ τῷ μέρει καλοῦμεν ἕνα ἕκαστον, ὅταν αὐτοῦ τὸ θυμοειδὲς διασπῇ διὰ τε λυπῶν καὶ ἡδονῶν τὸ ὑπὸ τοῦ λόγου παραγγελλέν δεινόν τε καὶ μὴ. Polit. IV. p. 442. B. C.

τὸ ἐπιθυμητικόν undique subjiendum τῷ λογιστικῷ⁶⁹⁾. Itaque quantum ad rationem attinet, hanc Plato nullis omnino vinculis includit, sed ubique illi obtemperari jubet, sive vetet sive concedat voluptatem et commodum; ira vero atque honoris studium eatenus coercenda sunt, quatenus rationi repugnant, neque tamen prorsus opprimenda, ut quae maxime interdum rationem juvent. Libidines denique omnes prohibendae quominus rationis imperium adsequantur, non vero prorsus relegandae et opprimendae. Sunt enim quaedam modicae et necessariae cupiditates, eaeque minime rationi contrariae, sed iustae ac licitae⁷⁰⁾. Quantum igitur Platonis ethica abest ab Epicureismo reliquisque voluptatis systematibus, in tantum discedit a rigida et humanae naturae contraria, Stoicorum aliorumque doctrina.

III. At vero uti ex iusta illa ratione animae omnes fluunt virtutes⁷¹⁾, ita perversa illa et corrupta omnia oriuntur et vitia et scelera⁷²⁾. — Proximus viro iusto est

69) Τι δέ; σὺφρονα οὐ τῇ φιλίᾳ καὶ ξυμφωνίᾳ τῇ αὐτῶν τούτων; ὅταν τό τε ἔρχον καὶ τοῦ ἀρχομένου ὁμοδοξῶσιν, ὡς δεῖν ἄρχειν τὸ λογιστικόν, καὶ μὴ στασιάζωσιν αὐτῷ; ἀλλὰ μὲν δὴ δικαίως γὰρ ὡς πολλάν τις λέγομεν, τοῦτο καὶ οὕτως ἔσται; — πολλὴ ἀνάγκη. ib. p. 442. C. D.

70) Polit. IV. p. 431. C — 432 A. VIII. p. 558 E. — 559 A. οὐκοῦν, ἄς τε οὐκ ἂν οἶδ' ὅτ' εἴμεν ἀποτρέψαι δικαίως ἀναγκαῖαι καλοῖντο, καὶ ὅσαι ἀποτελούμεναι ὠφελοῦσιν ἡμᾶς; τούτων γὰρ ἀμφοτέρων ἐφίεσθαι ἡμῶν τῇ φύσει ἀνάγκη, ἥ οὐ; — καὶ μάλα. Δικαίως δὲ τοῦτο ἐπ' αὐταῖς ἐροῦμεν τὸ ἀναγκαῖον. — Δικαίως. — Τι δέ; ἄς γέ τις ἀπυλάξειεν ἂν, εἰ μελετῶν ἐκ νέου, καὶ πρὸς οὐδὲν ἀγαθὸν ἐνοῦσαι δρῶσιν, αἱ δὲ καὶ τούναντίον πᾶσαι πάντας, εἰ μὴ ἀναγκαίους φαίμεν εἶναι, ἄρ' οὐ καλῶς ἂν λέγοιμεν; — καλῶς μὲν οὖν.

71) Polit. IV. p. 441. E. — 442. B.

72) Pervertam atque corruptam animae humanae rationem s. ἀδικίαν Plato vocat πολυπραγμοσύνην. vel ἄλλοτριπραγμοσύνην, ubi quaevis pars non sua, sed aliena agit.

ille, qui non rationi, sed τῷ θυμοειδεῖ τε καὶ φιλονεικῷ summum concedit imperium, eoque ipso φιλότιμος evadit. Quamvis enim pluribus virtutibus hic similis est iusto homini, quum sit fortis et temperans, tamen ut qui unice honoris studio trahitur, ad multa facinora abripitur, nec vera gaudet Prudentia. Rudior et agrestior erit adversus servos, erga principes obediens maxime, sed principatus honorumque avidior, neque tam humanarum disciplinarum quam rerum bellicarum studiosus ⁷³). — Illo tamen peior est et deterior ille, qui pecuniam maximi facit et ob avaritiam necessarias tantum libidines explet, ceteris vero sumitibus nequaquam indulget. Avaritia autem ista multarum injuriarum est causa. Neque vero talis homo libidines quasdam cohibet, rationi obtemperans, sed cupiditates in tali sunt cupiditatum dominatrices, meliores detriorum. Quamobrem modestior quidem erit multis aliis, sed consentiendis et compositae mentis virtus longe hunc effugiet ⁷⁴). Tertio gradu discedit ab homine iusto, qui non melioribus cupiditatibus deteriores coërcet, sed adeo nullum prorsus inter necessarias atque licitas et inter non necessarias easque illicitas libidines discrimen facit. Talis homo in diem vivit, et incidentibus praesentibusque cupiditatibus semper obsequitur. Omni recta opinione est destitutus, neque vitia dignoscit ⁷⁵). Pessimus denique omnium is est, qui non solum necessariarum et non necessariarum libidinum discrimen non facit, sed utique pessimis illis atque turpissimis devictus, iisque meliores cupiditates opprimit ⁷⁶). Quisquis rationi summum in omnibus imperium non concefferit, illa paulatim ad istum infimum humanitatis locum delabendi periculum subit, itaque semper et ubique id agendum est homini, ut ne ratio summo loco pellatur.

73) Polit. VIII. p. 548. E — 550. B.

74) ib. p. 554-555. B.

75) ib. p. 559-562.

76) Polit. IX. p. 771-577.

IV. Quodsi omnia, quae hucusque de virtute Platonica sunt disputata, computemus, arcta istarum singularum virtutum necessitudo et ratio manifesta est. Nemo enim potest esse prudens (σοφός, φρόνιμος) qui non simul sit fortis et temperans; Prudentia enim posita est in imperio rationis, temperantia autem est cupiditatum obsequium rationi praestitum, et fortitudo σωτηρία τῆς ὀρθῆς δόξας περὶ τῶν δεινῶν. Nemo praeterea fortis, nisi qui simul sit σοφός et σώφρων, alias enim aut falsam sequeretur opinionem περὶ τῶν δεινῶν, aut fortitudinem cupiditatibus vinci pateretur. Nemo denique temperans nisi prudens et fortis; sola enim vera temperantia ea est, quae libidines non libidinibus, sed ratione coërcet, ad coërcendas autem libidines fortitudine vera opus est. Itaque egregie Plato unam tantum esse virtutem expressit eo ipso, quod hanc in iustitia posuit. Simulac enim iusta animae ratio ceciderit, omnis virtus hominis evanescet. Pendet tamen haec universa virtus a rationis iusto imperio s. a prudentia, quum haec sola et ardori animi et libidinibus legitimos fines describere possit.

V. Percurramus hactenus eam virtutem, quam Plato a quolibet homine attingi posse minime negat. Haud quaquam vero, ex sententia ipsius, illa iustitia quam hactenus exposuimus omnis humana praestantia est consummata. Licet enim aliquis rationi in omnibus summum tribuat imperium, et eatenus prudens (σοφός, φρόνιμος) appellandus sit, quatenus rectam opinionem (τὴν ὀρθὴν δόξαν) qua aut educatione aut legibus imbuta est ratio ⁷⁷⁾ ubique servet nec sibi eripi aut timore aut cupiditatibus patiatur, tamen nondum firmum fundamentum virtutis ipsius adest, nisi accedat idearum perspicientia, et boni ipsius scientia ⁷⁸⁾.

77) Polit. IV. p. 429. C. D. 430. A. B.

78) Menon. T. II. p. 97. B. δόξα ἄρα ἀληθής, πρὸς ὀρθότητα πράξεως οὐδὲν χειρῶν ἡγεμῶν φρονήσεως καὶ τοῦτό ἐστιν ὃ νῦν δὴ παρελείπομεν ἐν τῇ περὶ τῆς ἀρετῆς ἀνέψει, ὁποῖόν τι εἴη, λέγοντες· ὅτι φρόνησις

Itaque necesse est, ut praestantissimus quisque hanc appetat scientiam eamque veram Sapientiam (*Φρόνησιν*) ⁷⁹⁾ qua ipsa philosophus evadit ⁸⁰⁾. Sapientiam autem illam acquirit homo dum rebus incertis et mutationi obnoxiiis minime inhaerens, ipsum bonum contemplatur, quod constans sibi et aeternum est, itaque vitam aget contemplativam magis quam activam ⁸¹⁾. In hunc autem praestantiae gradum quemvis hominem emergere posse, prae fracte negatur ⁸²⁾. Ut igitur vulgarium hominum virtus posita est in studio iustam animae rationem procurandi et tuendi, ita philoso-

μόνον ἡγεῖται τοῦ ὁρθῶς πράττειν. cf. ib. E. 98. A. καὶ γὰρ αἱ δόξαι αἱ ἀληθεῖς, ὅσον μὲν ἂν χρόνον παραμένωσι, καλὸν τὸ χρεῖμα, καὶ πάντα τάγαθὰ ἐργάζονται· πολὺν δὲ χρόνον οὐκ ἐθέλουσι παραμένειν, ἀλλὰ δρασκετενεύουσιν ἐκ τῆς ψυχῆς τοῦ ἀνθρώπου, ὥστε οὐ πολλοὺ ἔξαι εἰσίν, ἕως ἄν τις αὐτὰς δῆσιν αἰτίας λογισμῶ. — ἐπειδὴν δὲ δαδῶσι, πρῶτον μὲν ἐπιστήμαι γίνονται, ἔπειτα μόνιμοι.

79) Vocibus *Φρόνησις* et *σοφία* Plato non certam et definitam subdidit notionem, sed quum aliis vocabulis destitutus fuerit, duplicem illis dedit potestatem. Modo enim intelligit nihil aliud, nisi liberum imperium rationis, qualis haec est in quolibet homine, imbuta recta quadam opinione; modo vero, liberum imperium rationis, quae obtinuit perfectam boni et mali scientiam, itaque veram Sapientiam. Hoc bene tenendum ne inexplicabilibus systematis platonici nodis impediatur. — Quamvis autem Plato in *Politia* voce *δικαιοσύνη* non solum iustam animae partium rationem inter se invicem, sed etiam perfectissimam uniuscujusque earum rationem et conditionem intellexerit, quum summum vellet constituere et civitatis et hominis exemplar: tamen priorem potissimum tenuit notionem; qua ipsa Sapientia (necum Prudentia) f. praestantissima rationis conditio esset exclusa. Hoc probatur loco *Theaeteti* p. 176. *ἐμοίωσις δὲ μετὰ Φρονήσεως δίκαιον καὶ ὅσιον γίνεσθαι*, et pluribus aliis locis.

80) Vide *Philosophi descriptionem Polit.* VI. p. 485. C. D. — 490.

81) Haec fuisse disputata sunt in *Phaedone*. v. ll. cc. nota 34.

82) v. ll. cc. nota 48.

phus, quem perfectam istam iustitiam jam possidere oportet, virtutem ostendit in explorando et contemplando ipso bono et pulchro.

§. 13.

I. Haud quaquam negari potest, multa eorum, quae de virtute Platonica hucusque monuimus amice conspirare cum vi atque natura Christianae virtutis, ejusque fere speciem referre. Singula autem huc fere redeunt:

1. Pluribus in locis N. T. vox δικαιοσύνη eandem ac in Platoniciis libris habere videtur potestatem ita, ut omnis hominis virtus illà denotetur, et ea quae cuique homini opus est praestantia moralis ⁸³), quamvis rursus aliis in locis arctiore potestate sit circumscripta.

2. Etiam si Christianae ethices autores non tria ponant principia, quibus homo in diversas agendi partes trahatur, sed duo tantum, videlicet (τὸ πνεῦμα) ⁸⁴) rationem, atque sensus libidinesque corporis (τὴν σαρκά): tamen haec fere in unum redeunt, si respexerimus ad vim quam in actiones hominum exferant ⁸⁵). Non enim Christiana ethica negat, adesse quosdam animi affectus, iram, honoris studium, et universum animi ardorem. Quatenus tamen ista omnia rationi repugnant, hactenus illa voce σάρξ complectitur. Σάρξ enim est quicquid in natura hominis rationi

83) Matth. V, 6. διψῶντες τὴν δικαιοσύνην, ib. X, 20. ἐὰν μὴ περισσούσῃ δικαιοσύνη ὑμῶν. ib. VI, 33. καὶ τὴν δικαιοσύνην αὐτοῦ. Act. XIII, 10. Rom. VI, 18. 19. 20. VIII, 10. XIV, 17. Eph. V, 9. VI, 14. Rom. I, 17. ὁ δὲ δικαίος ἐν πίστει ζήσεται.

84) Quae sit τοῦ πνεύματος cum vi Spiritus Sancti cohaerentia non est quod hic curemus. Certum est, τὸ πνεῦμα (ex hebraico רִּחַר) complecti rationalem hominis partem.

85) Minime hujus loci est exponere psychologiam Christianam, quae minime est philosophica, sed vulgaribus hominibus accommodata.

(τῷ πνεύματι) adversatur⁸⁶). Quandoquidem igitur Christus et Apostoli jubent, rationem in omnibus esse sequendum, eique τὴν σαρκά subjiciendam⁸⁷), prorsus his continetur Platonis sententia, et ardorem omnemque animi impetum, et libidines eatenus esse coercenda atque reprimenda, quatenus rationis imperio reluctantur⁸⁸). Ponitur igitur virtus itidem in victoria, quam ratio de libidinibus atque affectibus reportaverit⁸⁹), et in vero eorum omnium contentu. Vetat ethica christiana ne impetus et ardor animi super rationem excrescat, eamque opprimere conetur, jubet tamen ut illa ipse ardor juvet rationem in opprimendis libidinibus, ipsique praesto adsit in quavis re agenda⁹⁰). Vetat praeterea, ne homo libidinibus se duci patiatur⁹¹), sed jubet simul ut illas, quas ratio censet esse licitas atque necessarias, expleat cupiditates⁹²). Quod igitur materiam virtutis (uti dicunt) spectat, nihil est in ethica Pla-

86) Gal. V, 19 sqq. *ὧσαυτά ἐστι τὰ ἔργα τῆς σαρκός, αἵτινά ἐστι μοιχεύειν — ἐχθραὶ ἔρεις, ζῆλοι, θύμοι κ. τ. λ.* cf. Col. III, 5-10. Jac. I, 19 sq.

87) 1 Petr. II, 11. *ἀπέχεσθαι τῶν σαρκικῶν ἐπιθυμιῶν, αἵτινες στρατεύονται κατὰ ψυχῆς.* Rom. VIII, 1. *οὐδὲν κατὰσιναι τοῖς — κατὰ σαρκά περιπατεῖν, ἀλλὰ κατὰ πνεῦμα* cf. v. 4. 6. *τὸ γὰρ φρόνημα τῆς σαρκός θάνατος, τὸ δὲ φρόνημα τοῦ πνεύματος ζωὴ καὶ εἰρήνη.* v. 8. *οἱ δὲ ἐν σαρκὶ ὄντες Θεῷ ἀρέσκει οὐ δύνανται.* v. 13. Gal. V, 16 sqq. VI, 8.

88) 1 Joh. II, 13. 14. *ἔγραψα ὑμῖν οἱ νεανίσκοι ὅτι ἰσχυροὶ ἔσσεσθε — καὶ νενικήκατε τὸν πονηρὸν.* V, 3. Matth. XVIII, 8. Luc. XIII, 24. VI, 32-36.

89) 1 Cor. IX, 24 sq.

90) Rom. XII, 11. *τῷ πνεύματι ζέοντες, τῇ σπουδῇ μὴ ὀκνηοί.* 1 Cor. XVI, 13. *στηκατέ ἐν τῇ πίστει, ἀνδρίζεσθε, κραταίωσθε.* Eph. IV, 26. *ὀργίζεσθε καὶ μὴ ἁμαρτάνετε.*

91) Gal. V, 24. 1 Theff. V, 16. Jac. V, 13.

92) Col. II, 16-23. Rom. XII, 15.

tonica, quod praeceptis atque naturae ~~ethicis~~ Christianae non sit consentaneum.

3. Sin formam virtutis spectemus hactenus Plato et Christus egregie consentiunt, quod ullam veram virtutem cogitari posse negant, quae non ex animo profecta sit, nec ullum vere bonum quod non ea de causa sit factum, quod ratio iusserit. Quamvis enim plures hominum actiones bonae esse videatur, quia secundum legem sunt factae, tamen non omnes illae revera bonae sunt. Multa enim homo egregie agit, variasque exercet virtutes vel ea de causa quod ignominiam civiumque despectum veretur, vel ut gloriam inde sibi paret. Libidines non necessarias neque licitas alius coercet, quoniam avaritiae inservit, itaque una cupiditas alterius imperium tenet⁹³). Honestè probeque agit tertius quidam, quod inde in tempus commodum sibi redundaturum sperat. Alius denique uti quoque tempore lubet, modo perperam agit, modo legitima patrat facinora, nullam causam sequutus, nisi eam quod ipsi pro tempore ita placuerit. Illos omnes vituperat Plato, neque veram iis tribuit virtutem (δικαιοσύνην), quoniam non rationi, sed aut animi ardori aut cupiditatibus summum tribuerint imperium. Quod enim bonum esse cognovit homo, illud faciendum est, nulla alius cuiusdam rei habita ratione, sed sui ipsius causa. Alias non virtus exoritur, sed illa timoris pro timore, cupiditatis pro cupiditate mercatura⁹⁴). Idem vero simul Christus et Apostoli praecipiunt, quum ubique

93) Polit. IV, p. 555. C. D. οὐκοῦν ἤδη ἐν πέλει, ὅτι πλοῦτον τιμῇ καὶ σωφροσύνην ἅμα ἱκανῶς κτῆσθαι ἐν τοῖς πολλοῖς, ἀδύνατον, ἀλλ' ἀνάγκη, ἥ τοῦ ἐτέρου ἀρελῆς, ἢ τοῦ ἐτέρου. cf. Luc. XVI, 13. οὐδεὶς οὐκίτης δύναται δουτοὶ κυρίοις δουλεύειν ἢ γὰρ τὸν ἑνα μισήσει, καὶ τὸν ἕτερον ἀγαπήσει. — οὐ δύνασθαι Θεῷ δουλεύειν καὶ μαμμωνῇ.

94) Phaed. T. I, p. 69. B. v. l. c. nota 44.

exigant sinceritatem animi ⁹³), virtutemque non externis-
ritibus servandis, et quae lex postulet exsequendis offendi
jubeant, sed animi puritate ⁹⁴). Purus enim atque sincerus
est animus, qui nulla laborat menda, nec ullo ducitur, in
agendo aut utilitatis aut gloriae aut ostentationis studio ⁹⁵),
sed qui honestum bonumque appetit et prosequitur solam
eam ob causam, quod Deus id ipsum jusserit. Quisquis
enim Dei voluntati obtemperat, rationem sequatur, necesse
est, qua sola praecepta divina homini sunt patefacta.

4. Virtus ex sententia utriusque ethices ita debet esse
comparata, ut nunquam aut temporibus aut rationibus aut
vi qualibet possit labefactari et obrui. Etiam si ad mortem
usque cruciatur, omnibusque rebus privetur vir justus et
vere virtuti incumbens, tamen hanc nunquam sibi eripi pa-
tietur, sed forti animo adeo violentam obibit mortem. Haec
Plato egregie expressit in illustri loco Politiae suae ⁹⁶), ea-
demque in N. T. saepe repetuntur ⁹⁷).

5. Neque Plato neque Christus voluit, unquam in hac
vita virtutem esse omnibus numeris absolutam, sed semper
hominem in altius eniti, magisque in dies praestantissimo
numini appropinquare uterque jussit. Duabus enim rationi-
bus perpetua perfectione eget virtus humana. Primum,
quod inferiores hominis partes, libidines atque animi impe-
tus nunquam cessant, sed perpetuo rationi reluctantur, ca-
vendum est homini quovis tempore, ne justa ratio, rationis-
que imperium tollatur. Hoc Plato expressit in Phaedro ⁹⁸),

95) Matth. V, 8. *μακάριοι οἱ καθαροὶ τῇ καρδίᾳ.*

96) Matth. XV, 1-23. Luc. XI, 37 Iqq. Matth. XXIII, 5-7. Joh.
IV, 21-24. Rom. XIII, 5.

97) 1 Petr. V, 2. Matth. V, 46-48. 1 Cor. IX, 17.

98) P. 361. B. *τὸν δίκαιον παρὰ τὸν ἀδίκον ἰστώμεν τῷ λόγῳ, ἄνδρα
ἀπλοῦν καὶ γυναικῶν κ. τ. λ.*

99) Matth. XII, 33-37. Rom. VI, 12-14. VIII, 34. 1 Thess. V, 23.
1 Cor. VI, 20. X, 31. 2 Cor. VI, 4 Iqq. Col. III, 17.

100) T. III. p. 242 B. C.

ubi rationem aurigae ferocissimos equos regenti comparat. Idem vero et in N. T. saepe repetitur ¹). Itaque virtus in majorem semper firmitatem et habilitatem quandam emergere potest. Deinde vero virtus semper perficienda est, quoniam in hac vita unquam absolutissima boni ipsius notio acquiri nequit, quod quidem Plato in Phaedone et in Politia corporis cum anima consuetudine tribuit, ita, ut corpus animae carcerem appellaverit ²). Apostoli autem et Christus saepe monent Christianos, ut quam possint optimam voluntatis, divinae cognitionem sibi parare non desinant ³). Praeterea vero ista virtutis ratio, qua perpetua perfectione eget, expressa est in utriusque ethices, quam comparamus postulatione ea, ut homo quantum possit Deo simillimus fieri studeat.

6. Denique in N. T. pari modo docetur singularum virtutum tanta cohaerentia, ut si quis unam neglexerit, universae legis culpam mereatur ⁴), et si quis vera virtutis vi imbutus sit, simul omnes singulas virtutes exerceat ⁵).

1) 1 Petr. II, 11. I, 15. 2 Tim. IV, 7. τὸν ἀγῶνα τὸν καλὸν ἡγωνίσ-
μαι. Hebr. XII, 1. ἡ ὑπομονὴς τρέχουμεν τὸν προκείμενον ὑμῖν ἀγῶνα.

Phil. III, 12. οὐκ ἔτι ἤδη ἔλαβον (τὸ βραβεῖον) διώκω δὲ εἰ καὶ
καταλάβω cf. 1 Cor. IX, 24. 1 Joh. I, 8.

2) Phaëd. p. 66. Polit. VII. p. 514 149q.

3) Col. I, 9. ἵνα πληρωθῇτε τῇ ἐπίγνωσι τοῦ θελήματος αὐτοῦ ἐν
πάσῃ σοφίᾳ καὶ συνέσει πνευματικῇ. v. 11. 28. c. III, 10. Phil. I,
6. 9. 10. Marc. X, 18.

4) Jac. II, 10, ὅστις γὰρ ἔλον τὸν νόμον τηρήσει, πταίσει δὲ ἐν ἑνί,
γέγονε πάντων ἔνοχος. cf. Matth. V, 19. Hic locus haud dubie
ita intelligendus, ut si quis contra unam legem moralem peccet,
eo ipso reliquarum quoque legum moralium, quarum unus idem-
que Deus auctor est, contemptum prodit, et mentem vera in Deum
pietate destitutam.

5) 1 Cor. XIII, ubi vox ἀγάπη omnem hominis virtutem complecti-
tur. v. quae infra sequuntur. Similis sensus inest loco Matth. VI,
22 14. ὁ λύχνος τοῦ σώματος ἐστὶν ὁ ὀφθαλμός — εἰ οὖν τὸ φῶς τὸ

Una igitur est virtus, quae totum hominum omnesque ejus vires complectatur, earumque justam exposculet rationem. Haec eadem, uti supra vidimus, Platonis est sententia.

II. Verum tamen, quamvis haec tot tantaque sint, in quibus de virtutis natura Plato et Christus amice conspiciant, mirum est quantum inter utrumque intercedat discrimen. Quo cognito, quando divinum vocaverimus Platonem, Deum nuncupabimus Christum.

I. Quamquam Plato admodum puram constituit virtutis humanae rationem, remota omni ostentatione ac speciosa ratione, repulso omni proprii commodi atque praesentis voluptatis studio, abjecta denique omni servili erga leges publicas obedientia, tamen nullam fere in illa cordis habuit rationem. Omnis enim virtus posita est in justa quadam hominis ratione, omniaque hominis officia non nisi eam obcausam sunt perficienda, quod ratio jussit. Quamvis autem inde omnia egregie facta profluant, manet tamen illa ethica frigidior et animum hominis quodammodo inanem relinquit. Jam vero certhitur ethicae Christianae praesentia, quae omnes hominum actiones ex amore tum Dei tum proximi prodire jubeat, ipsamque hominis virtutem in amore ponat 6). Haec est illa egregie fervoris nostri doctrina, quod homines omnes sese fratres, Deumque unius familiae benignum et amantissimum patrem habere jussit 7). Qua quidem nihil magis egregium,

ἐν σοὶ σκότος ἐστὶ, τὸ σκότος πόσον; ubi. Ὡς idem esse videtur, quod paullo ante καρδία, desiderium, et inclinatio hominis. "Si quis desiderium suum in res vanas direxit, omnis animus, omnisque virtus obumbratur et obcaecatur, cf. 1 Cor. V, 6.

6) Hoc ita notum, ut vix locis probantibus opus sit, v. potissimum 1 Joh. III, 23, coll. c. V, 2. 3. IV. c. III, 10. ὁ μὴ ποιῶν δικαιοσύνην — ὁ μὴ ἀγαπῶν τὸν ἀδελφὸν αὐτοῦ. pro synonymis habentur. 1 Cor. XIII.

7) 1 Joh. III, 11. V, 2. Matt. V, 45. 48. Luc. XI, 2. 2 Cor. VI, 18. Rom. VIII, 15. Gal. IV, 6.

nihil homine dignius, nihil denique animos hominum magis juvans atque erigens cogitari potest. Ut enim rationalis, ut ita dicam, ethica, quae istius amoris vi est destituta, probum hominum justumque reddere potest, ita rationali agendi principio addita vis illa amoris, per totum interni hominis habitum singularem quendam et peculiarem effundit vigorem, et veram istam sanctitatem (*ἀγιστῆν*) quae cum verbis exprimi nequeat, sensu interno percipienda est. — Minime vero amore illo tollitur principium, quo sola ratio in agendo audienda est, immo juvatur atque alitur. Quisquis enim vero Dei et proximi amore imbutus est, ille neque aut commodi, aut gloriae aut voluptatis causa, neque invitus bonus erit et honestus, sed laeto et prompto animo bonum et honestum quodvis exsequetur sui ipsius gratia, certissime, ratus, sese tali virtute sibi benevolentiam unice esse paraturum. Hinc si cardinales quasdam ethicae Christianae adjudicare velimus virtutes, merito illas in amore Dei ac proximi ponemus. Ut igitur optimus quisque secundum Platonis ethicam optimam necesse est habeat perspicientiam boni, summaque gaudeat iustitia, ita secundum praecepta Christi optimus is est, qui maxime Dei et proximi imbutus est amore. Quamvis autem vel Plato interdum Deum benevolum patrem bonorum hominum esse dicat⁸⁾, tamen nullibi amoris hominum erga Deum egregiam tribuit vim in actiones atque virtutem hominum, et licet saepe civium omnium concordiam atque amorem commendet, tamen ipsi amor ille nunquam est movens actiones principium, sed uti reliquae virtutes societati humanae praestandae, iustitiae suae subiectus. Etiam amor ille (*ἔρως*), de quo in Symposio et in Phaedro sermo est, prorsus alienus est a nostra amoris notione⁹⁾.

8) De Legg. B. X.

9) Oppositus est hic amor amoris Venereo. Quum enim Graecis amoris (*ἔρως*) semper injecta sit notio gignendi, Plato hanc ip-

2. Praeterea virtus Christiana a Platonica differt eo, quod illi simul inuncta est arctissime notio fidei. Non quidem hic agitur de fide historica atque positiva illa, quae hoc loco in comparisonem venire nequit, sed de ea fide, qua nobis persuasum est tum licitum esse aliquid, vel illicitum, tum Deum omnium actionum humanarum esse et legislatorem et summum judicem. Si quis enim revera aliquid patriverit, quod per se licitum sit, dubitans tamen an sit illicitum, per Deum, ille perperam egit, nec quidquam, etiam si per se bonum sit, virtutis nomen meretur, nisi inuncta est isti certissima persuasio, Deum illud ipsum iussisse, atque de quolibet a nobis facto olim iudicium esset laturum¹⁰). Tribuitur autem isti persuasioni, si modo iusta

sam notionem ad excitationem et procreationem divinarum idearum, quarum quasi semina in quovis meliori animo latent, applicavit. Itaque amor platonicus nihil aliud est, quam studium, quo egregiae animae (schöne Seelen) conjunguntur, ad ideas illas ethicas in se dormientes, excitandas et in vita repraesentandas. Sympos. p. 206. A. *ἔστιν ἄρα ἐπὶ τῶν ἰδεῶν ὁ ἔρως τοῦ τὸ ἀγαθὸν αὐτῶν εἶναι ἀέλ.*

- 10) Rom. XIV, 22. 23. coll. Tit. I, 15. Ebr. XI, 6. Idem Paulus in toto capite IV. epistolae ad Romanos satis subtili disquisitione probare studet. Nimirum dicit, Abrahamum Dei gratiam impetrasse non quod leges sequutus sit, v. c. quod suceperit circumcisionem, sed ideo, quod veram habuerit fidem in Deum h. e. quod vitam egerit, quam sibi persuasissimum erat, Deo fore gratam. Hoc inde probare studet Ap. quod illi promissiones divinae de ampla progenie contigerint, priusquam fuerit circumcissus, et legem quandam positivam sequutus fuerit. His omnibus Ap. nihil aliud voluit efficere, nisi hoc: minime sufficere, legem servari, etiam si illa divina sit, nisi accedat ea certissima persuasio, obsequio legi praestito nos nobis conciliaturos esse gratiam Divinam, neque legis observationem, sed fidem cum illa conjunctam nobis mereri Dei benevolentiam. Haec autem sane verissima sunt, nec solum ad Christianos istius temporis spectant, sed ad universum genus humanum. Profecto vero falsi sunt, qui, ut plurimum fit, fidem Abrahami ponant in eo animo, quo divinitus sibi promissa acceperit, h. e. in fiducia de Deo.

sit, vis virtutem quotidie efficiendi. Quodsi et Amor ille erga Deum et haec fides simul virtuti Christianae inhaereat, eamque moveat necesse est, efficitur, omnem virtutem humanam simul esse debere pietatem erga Deum. Hinc autem vis singularis et peculiaris formae Christianae virtutis accrescit. Plato enim iustitiae suae minime notionem pietatis addit, sed rationi, ait, est obtemperandum, quatenus illi summum debetur imperium, ut quae hominem a bestia distinguit. Quamquam vero virtute hominem Deo appropinquare et boni notionem, quam Deus animis indiderit agendo exsequi contendat, tamen nullum his inest Christianae pietatis vestigium, et *δικαιος* esse potest ex mente Platonis, qui minime de summo numine cogitaverit. Quod autem attinet ad *οσιότητα* et *εὐσεβειαν*, illam quidem Plato non solum ponit in sacrificiis offerendis, ritibusque religiosi servandis, sed in interna etiam mentis et animi ratione ¹¹⁾, qua Deus sit adorandus, minime vero illi tantum vim concedit, quantum Christus, ut universae hominis virtuti iustam praebeat formam ac rationem. Immo iustae hominis rationi (*δικαιοσύνη*) subjungit pietatem (*οσιότητα*) ¹²⁾. Deo praestandam, veluti quaelibet reliqua officia alterius erga alterum, civium erga principes, liberorum erga parentes. Neque potuit esse omnis virtus Platonica pietas in

11) Cf. Euthyphron, T. I. p. 2-16. ubi totum argumentum hoc tractatur. coll. Gorg. p. 507. B. Epinom. p. 989. A. B. *μᾶλλον μὲν γὰρ ἀρετῆς μὲνδεὶς ἡμῶς ποτὶ καὶ τῆς ἐνσεβείας εἶναι τῷ Σὺν τῷ γένει.*

12) Quamvis Plato contendat, τὸν *δικαίον* esse simul *οσίον*, tamen hoc nec ipse probavit, nec apte elici potest ex notione ipsius iustitiae, quae posita est in *δικαιοπραγίᾳ* omnium animae partium. Hoc fortasse ipse sensit, quum aliis in locis, ubi summam hominis praesentiam definivit, iustitiam (*δικαιοσύνην*) et pietatem (*οσιότητα*) sejunxerit. v. Theaet. p. 176. *ὁμολογῶν δὲ δίκαιον καὶ ὅσιον μετὰ φροσύνης γενέσθαι.*

Deum eo sensu, quo Christus hanc cum illa conjunxit, quum Plato (id quod supra vidimus) summam actiones hominum moventem causam non in voluntate divina, sed in ipsius boni natura posuerit. Virtus enim eo ipso fit pietas, quando conjuncta est cum ista conscientia obsequii voluntati divinae praestiti, eaque potissimum hominem ad bene agendum movet.

3. Tertio loco ethicae Christianae proprium hoc est, quod urget in virtute submissi in Deum animi notionem. Jubet enim, ne nimium meriti in virtute homo sibi suisque viribus tribuat, sed ut Dei gratiae plurimam accenseat partem, quod ipsi potestatem dederit et tentationibus resistendi, et bonum quolibet efficiendi ¹³). Vetat praeterea ne ullum divinum beneficium postulet, tanquam remunerationem virtutis suae, quum licet optimus sit, nunquam plus quam debuerit, facere queat ¹⁴). Haec tamen animi submissio (ταπεινοφροσύνη) non ejusmodi est, ut singularem quandam efficiat virtutem, sed cuivis et universae virtuti adjuncta esse debet, ne cum superbia et elatione animi simul omnis virtutis laus intereat. Hinc optimus quisque unquam sibi vindicabit prae reliquis hominibus praestantiam, semper animo perpendens, vel se haudquaquam esse omnibus numeris absolutum ¹⁵). Quibus si, quae Platonis

13) Rom. XII, 3. 1 Cor. XII, 6 sqq. ὁ δὲ αὐτός ἐστι Θεός, ὁ ἐνεργῶν τὰ πάντα ἐν πάνσιν cf. Phil. II, 13. Eph. IV, 7. 1 Cor. IV, 7. τίς γάρ σε διακρίνει; τί δὲ ἔχεις οὐκ ἔλαβες; εἰ δὲ καὶ ἔλαβες, τί καυχᾶσαι ὡς μὴ λαβὼν;

14) Luc. XVII, 10. οὐτὼ καὶ ὑμεῖς, ὅταν ποιήσητε πάντα τὰ διαταχθέντα ὑμῖν, λέγετέ· ὅτι δοῦλοι ἀχρεῖοί ἐσμεν· ὅτι ὁ ὠφείλομεν ποιῆσαι, πεποιήκαμεν.

15) Phil. II, 3. ἀλλὰ τῇ ταπεινοφροσύνῃ ἀλλήλους ἡγούμενοι ὑπερέχοντας ἑαυτῶν. 1 Petr. V, 5. τὴν ταπεινοφροσύνην ἐγκαμβώσασθε. Matth. XX, 28. Huic tamen animi submissione minime repugnat sensus internae dignitatis.

ethica continentur, e regione posuerimus, 'prorsus contrariam sententiam inveniemus. Quamvis enim negari nequeat, vel illum interdum ita loquutum esse, ut constantem virtutem ac probitatem singulari Deo auxilio tribuere videatur ¹⁶⁾, tamen ipse illud tam extra ordinem rerum fieri nec in omnibus hominibus, contendit, quam nusquam inde submissi animi virtutem derivat. Immo philosophum dicit omnes res humanas esse aspernaturum, quippe qui nullibi τὸ ὄντως ὄν, sed ubique umbras idearum conspiciat, omnibusque rebus agendis, nisi summum imperium sibi contigerit, sese subtrahendum esse ¹⁷⁾. Quibus etiam si quis Platonem nihil aliud denotare voluisse contendat, nisi internae dignitatis sensum, tamen huic non injuncta est notio Christianae ταπεινοφροσύνης, quae eadem minime illi sensui contraria est. Inde factum est, ut ethica Christiana prae reliquis omnibus virtuti universae simul indiderit vim clementiae, modestiae omnisque humanitatis ¹⁸⁾.

4. Plerumque fit, ut quando de ethica Platonica atque Christiana feratur judicium, egregiam ponant similitudinem in ea re, quod utriusque ethices auctores mentem jusserint quotidie in Deum intendi. Ubi tamen si verum spectemus, omnis similitudo relinquitur fere in verbis. Quum enim Platoni Deus et bonum (τὸ καλὸν καὶ ἀγαθόν) unum idemque sit, ista mentis intentio nihil aliud

16) Polit. VI. p. 492. A. εἰν μὴ τις αὐτῇ βοηθήσας Θεῶν τύχη E. Θεῶν μάντοι (ἥθος) κατὰ τὴν παροιμίαν ἐξαίρω λόγον· εὐ γὰρ χρὴ εἰδέναι, ὅ, τι περ ἂν σωθῇ τε καὶ γένηται οἷον δεῖ, ἐν τοιαύτῃ καταστάσει πολιτῶν, Θεοῦ μοῖραν αὐτὸ σῶσαι, λέγων, οὐ κικῶς ἐρεῖς.

17) Quae Plato monet de facili et cicuri ingenio philosophi, ne sit δυσξύμβολος, δυσκοινώνητος, ἄγχιος, ea pertinent ad communitatem societatemque vitae. Polit. VI, p. 486. B.

18) Jac. III, 13-17. 1 Petr. III, 15.

significat, nisi perpetuam meditationem de eo, quod in quaque re sit vere bonum propter se ipsum¹⁹⁾. Itaque intentio mentis in Deum, ex mente Platonis, est philosophica inquisitio in vim atque naturam boni et pulchri, a rebus in sensus cadentibus abstrahens notiones generales, cui quidem momentum religiosum additur eo, quod Deus idearum s. notionum illarum auctor est, summumque exemplar. Itaque jubet Plato, ut praestantissimus quisque et mentem quantum possit a vi corporis liberet, seque ipsum penitus cognoscere studeat²⁰⁾, et externarum rerum non species, sed internam naturam contempletur²¹⁾. Minime vero necesse est, ut homo ad Deum h. e. ipsum bonum contemplandum societatem humanam fugiat, immo nemo magis inter homines versari debet quam philosophus, ut in ipsis animis hominum excitet divinas ideas et quodam-

19) Polit. VI. p. 500. B. C. οὐδὲ γὰρ που — σχολή τῷ γε ὡς ἀληθῆς πρὸς τοῖς οὖσι τὴν διάνοιαν ἔχοντι, κάτω βλέπειν εἰς ἀνθρώπων, πραγματείας, καὶ μαχόμενον αὐτοῖς φθόνου τε καὶ θυμωσείας ἐμπύμπλασθαι· ἀλλ' εἰς τεταγμένα ἅττα καὶ κατὰ ταῦτά αἰεὶ ἔχοντα ὁρῶντας καὶ θεωμένους, οὐτ' ἀδικοῦντα οὐτ' ἀδικούμενα ὑπ' ἀλλήλων, κόσμῳ δὲ πάντα καὶ κατὰ λόγον ἔχοντα, ταῦτα μιμεῖσθαι τε καὶ ὅτι μάλιστα ἀφομοιοῦσθαι. — Θέλω δὲ καὶ κοσμίῳ ὅγα φιλόσοφος ἐμμελῶν, κόσμιος τε καὶ θαῖος εἰς τὸ δυνατόν ἀνθρώπων γίγνεται. ib. VII. p. 517. B. ἐν τῷ γνωστῷ τελευταία ἡ τοῦ ἀγαθοῦ ἰδέα — αὕτη κυρίᾳ ἀληθείαν καὶ νοῦν παρασχομένη· καὶ ὅτι δεῖ ταύτην ἰδεῖν τὸν μέλλοντα ἐμφρόνως πράξειν.

20) Pluribus locis hoc Plato exposulat, Charmid, T. II. p. 614. D. E. Phileb. T. II. p. 48. C. Phaedr. T. III. p. 229. E. 230 A.

21) Si quis Phaedonem satis diligenter legerit, intelliget Platonem, ubi jubet animam αὐτὴν κατ' αὐτὴν esse, nihil aliud voluisse, nisi ut anima neque sensibus decipiatur, neque ulla alia externa specie impediatur, quo minus veras indagare possit. Haudquaquam de vita solitaria, quam philosophus debeat appetere sermo est.

modo concubat cum illis ²²). Hac enim ipsa in re cer-
nitur mens in Deum intenta, ut quod in quaque re ex-
terna sit divinum, cognoscere studeat. Philosophus igitur,
ex sententia Platonis, fortasse tum maxime in Deum est
intentus, ubi maxime hominum consuetudine gaudet. Jam
vero ab hac sententia ethica Christiana aliquantum differt.
Quoties enim de animi in Deum intentione sermo est, to-
ties intelligitur Deus Optimus Maximus, coelestis pater
atque creator universi mundi, qui tamen terrenis rebus
minime inclusus extra mundum vivit, ad quem preces vo-
taque fundimus, summus iudex omnium actionum huma-
narum. Ad illum non solum mens atque ratio, sed uni-
versus animus est dirigendus ita, ut consuetudine cum Deo
et cognitio et voluntas hominis quotidie purior fiat et
sanctior. Hinc necesse est, ut homo interdum ad animum
colligendum loca solitaria petat, de Deo ejusque volunta-
te cogitet, preces fundat et summa animi devotione et
adoratione imbuatur ²³). Ut igitur ex mente Platonis,
intentionis in Deum sola mens atque ratio particeps est,
ita ethica Christiana totam internam hominis naturam at-
que indolem in Deum intendi jubet, nec in Deum tan-
quam idearum auctorem et possessorem, sed in Deum be-
nignum sanctissimumque patrem generis humani.

5. Ex omnibus quae jam de virtute Christiana sunt dis-
putata, nunc intelligitur, non eandem esse *δικαιοσύνην* Pla-
tonicam et Christianam, quamvis huic voci utrimque uni-
versae virtutis humanae notio adjungatur. Plato enim
revera retinuit notionem justitiae, quae cuique suum tri-
buitur, eamque adhibuit ad justam rationem animae. In

²²) v. ll. cc. nota 37.

²³) Haec non ita singulis locis probantur, quam ipso exemplo
Christi, qui pluries ad animum colligendum et in Deum flecten-
dum loca solitaria petiisse narratur, quamvis per totam vitam
nunquam de Deo non cogitaverit. Matth. IV, 1-11. XVII. XXVI,
36 sqq. c. VI, 6,

novo autem testamento illa notio prorsus evanuit, et *δικαιος* dicitur qui talis est, qualis esse debet, integer et purus, ex hebraico *צדיק*. Quamvis igitur ad unam eandemque potestatem illius vocis et Plato et Novi Testamenti auctores convenerint, tamen diversa via profecti sunt.

§. 14.

Ex proposito nobis consilio liceat rursus in fine hujus capitis quaedam monere de ratione, qua tanta in doctrina de virtute utriusque ethices similitudo oriri potuerit, ne nimis temere in illam sententiam abripiamur, ut aut Christum aut Apostolos ex Platoniciis principiis quaedam in suam doctrinam transtulisse arbitremur. Certe indigitabimus quae in tali judicio bene tenenda sint atque considerata.

1. Quod quidem attinet ad vocem *δικαιοσύνη*, qua et Plato et Christus summam humanae virtutis complexi sunt, vidimus quam diversa utriusque sit ratio.

2. Quod vero uterque loquitur, de certamine rationis et libidinum, hoc ita in re atque natura positum est, ut nullus adhuc homo, qui de rebus ethicis cogitaverit, illud certamen revera adesse negaverit. Discrimen potius in eo positum est, in utrius victoria virtutem quaesierint. Libidinibus autem victoriam nunquam accensuit orientalis quisquam, sed jam in V. T. purissimae de illa re notiones sunt expressae. Melioris indolis ponamus hominem quemque, et sponte ille rationi victoriam de libidinibus concedet. Praeterea hoc idem cogitur ex sana de Deo notione.

3. De virtute voluntaria nec suum commodum suamque voluptatem ubique spectante legem non ferre non potuit, qui ad tantum proximi et Dei amorem, quantum nullus unquam philosophus cogitavit, animum et ingenium sponte potuerit attollere. Itaque vel in hac notione de Platonicae et Christianae ethices externa quadam conjunctione cogitare prorsus superfluum est.

4. Quoad constantiam virtuti vel in summis calamitatibus praestandam, nemo profecto audebit contendere, Christum ipsum Platoniciis principiis adductum esse, ut ipse pro veritate et virtute crudelissimam mortem subierit. Quae vero Apostoli de illa constantia praecipiant, ad ea exemplo praeceptoris sui illos esse potissimum adductos, quis est, qui neget?

5. Ad perfectibilem virtutis rationem et Plato et Christus duci debebant posita illa sententia, homines virtute Deo similes fieri. Quodsi in illa sententia externa conjunctio non est, eandem nec in hac accipere cogimur.

6. Quamvis uterque doceat arctissimam omnium virtutum cohaerentiam; tamen diversa via profecti sunt. Plato enim pervenit ad illam sententiam sua ratione iustitiae, Christus vero posita una lege morali, cujus totius contemptum ostendit, qui unum praeceptum transgressus sit.

7. In utriusque ethices sententia de vita contemplativa magis admiranda est discrepantia quam similitudo.

8. Si quis ex conspiratione singulorum locorum Novi Testamenti cum dictis platoniciis aliquid in hac re concludere velit, ille plura concedere coactus erit, quam ipse fortasse cupiat. Cogeretur enim, aut Christo aut Apostolis non solum principia sed libros etiam Platonis innotuisse. Neque vero singuli loci in tanta re quidquam possunt probare, quum simillima in pluribus libris, minime a se invicem pendentibus reperiantur.

9. Denique, si poneremus Platonis principia inter Iudaeos satis nota fuisse, qui factum esset, ut illud summum totius virtutis Platonicae principium de anima tripartita non innotuerit, cujus nullum usquam reperimus in N. T. vestigium?

CAPUT III.

DISQUIRITUR DE VIRTUTIS AD FELICITATEM RATIONE, QUALIS ILLA IN PLATONICA ATQUE CHRISTIANA ETHICA EST CONSTITUTA.

§. 15.

Quamquam Plato in vera virtute eaque iustitia sua summum videret humanae vitae finem, quem appetere humanae naturae consentaneum esset, tamen minime non cognovit, cuique homini inesse etiam felicitatis appetitum, quem nemo unquam possit extinguere ²⁴). Itaque siquidem virtus universo homini satisfacere debet, cum ea simul felicitas summa conjuncta fit necesse est. Sin minus, nemo unquam illam appeteret ²⁵). Videndum igitur est, utrum iustitia illa veram felicitatem praebet, necne.

1. Virtus per se suaeque naturam praebet felicitatem, quum posita sit in iusta singularum animae partium ratione (*οικαιοπραγία*) et harmonia. Itaque ea sola est animae sanitas bonusque habitus (*εὐεξία*) ²⁶); contra vero, simulac ista ratio sublata est, oritur animae morbus atque imbecillitas ²⁷). Atqui sanitas perpetuum praebet sensum jucundum ex bona constitutione nostra manantem. Rationis enim imperio ubique servato oritur beata illa conscientia animi, in quo ordo ubique regnat ²⁸), qui sibi conso-

24) Euthydem. T. I. p. 282. A. *εὐδαίμονες μὲν εἶναι προθυμοῦμεθα*

πάντας. cf. Legg. V. p. 732. E. 733. A-D. Phileb. T. II. p. 21.

D. 22 B. (cf. Morgensternii de Republica comm. II. p. 115.)

coll. p. 60. E. sq.

25) Phileb. l. c.

26) Polit. IV. p. 444. E. Gorg. T. I. p. 526. D.

27) Polit. l. c.

28) Gorg. p. 482. A.-C. 504 B. 506. D. E. 507. A. sq.

nat²⁹), qui se ipso acquiescit³⁰), scaturit pacis placidissimae, tranquillitatis aequabilissimae atque adeo laetitiae purissimae homini in se ipso fons perennis, pellucidus et pulcherrimus³¹). Praeterea vero quaevis animae pars habet voluptatem sibi propriam, quarum quidem rationalis partis voluptas omnes reliquas longe superat, siue ἐμπειρία, siue φρόνησις et λόγῳ dijudicentur³²). Immo nullius nisi sapientis voluptas vera est et sincera, reliquae omnes adumbratae, inanes, et simul dolore mixtae³³). Quisquis igitur φρόνιμος et φιλόσοφος non est, ille summam voluptatem ne delibare quidem, potest. Denique solus δίκαιος vera gaudet libertate, quum in illo id quod solum aptum est et idoneum imperando (τὸ λογιστικόν) imperio fruatur, nec reliquorum tyrannide prematur, reliquae vero partes animae minime prohibeantur, quominus quae sibi facienda sunt, faciant³⁴). Tum enim ratio haud cogitur, ut quae ipsa nolit, fieri patiatur, sed homo in homine super bestiam imperium tenet. — Etiam si igitur experientia edocti, saepe videremus, nullam fere virtutem habere externam merce-

29) De Legg. III. p. 689. D. πῶς γὰρ ἂν, ὃ φίλοι, ἄνευ ξυμφωνίας γένοιτ' ἂν φρονήσεως καὶ τὸ μικρότατον εἶδος, οὐκ ἔστιν· ἀλλ' ἡ καλλίστη καὶ μεγίστη τῶν ξυμφωνιῶν μεγίστη δικαιότατ' ἂν λέγοιτο σοφία· ἥς ὁ μὲν κατὰ λαγον ζῶν μετοχος. cf. Polit. IV. p. 443. D. E. Phaed. T. I. p. 93. E.

30) Menex. T. II. p. 246. D. E.

31) Phileb. p. 63. E. ἄλλας τε ἡδονὰς ἀληθεῖς καὶ καθαρὰς, ἃς εἶπες σχεδόν, οἰκίας ἡμῖν νομίζε· καὶ πρὸς ταύτας, τὰς μετ' ὕγιαίας καὶ τοῦ σωφρονεῖν, καὶ δὴ καὶ ξυμπάσης ἀρετῆς· ὁπόσαι καθάπερ Θεοῦ ὁπαδοὶ γιγνόμεναι, αὐτῇ ξυνακολουθοῦσι πάντῃ. Legg. T. II. p. 663. cf. etiam Xen. Mem. IV, 5, 6. I, 6, 8, 9.

32) Polit. IX. p. 580. D - 563 A.

33) Polit. IX. p. 583 B - 588 A. ὅτι οὐδὲ παναληθές ἐστιν ἡ τῶν ἄλλων ἡτονή, πλήν τῆς τοῦ Φρονίμου, οὐδὲ καθαρὰ, ἀλλ' ἐσκιαγραφημένη τις. cf. quae in Philebo de voluptatum natura uberrime sunt expōita.

34) Polit. IX. p. 577 C - 578. B.

dem, et plerumque fieri, ut qui justus sit, summa miseria deprimatur, injustum vero summa felicitate externa extolli, tamen manet virtute ipsi suum necessarium præmium, quod in ipsius natura latet, et ubique justus felicius est injusto³⁵⁾. Virtus igitur omnium bonorum summum est³⁶⁾, vitiositas omnium malorum maximum; neque so-

35) Haec quaestio gravissima in Politia proponitur. Glaucus et Adimantus mira eloquentia summam injusii hominis, si modo injustitiam recondere sciat, felicitatem, ejus vero, qui sit nec videatur justus, extremam miseriam depingunt; poscunt etiam, ut justitiae eam, qua per se bonum quoddam sit, excellentiam Socrates demonstret, mercedibus, et quae ex ipsis proveniant missis. Polit. II. p. 358. B. D. p. 366. D. E. 367. B. μή οὖν ἡμῖν μόνον ἐνδείξῃ τῶ λόγῳ ὅτι δικαιοσύνη ἀδικίας κρείττων, ἀλλὰ τί ποιοῦσα ἀατέρᾳ τὸν ἔχοντα, αὐτῇ δι' αὐτήν, ἡ μὲν κακὸν, ἡ δὲ ἀγαθὸν ἐστὶ. — Τὰς δὲ δόξας ἀφαιρεῖ, ὥςπερ Γλαῦκων διεκλεύσκει· εἰ γὰρ μὴ ἀφαιρήσεις ἐκατέρωθεν τὰς ἀληθείας, τὰς δὲ ψευδεῖς προσθήσεις, οὐ το δίκαιον φήσομεν ἐπαινεῖν σε, ἀλλὰ τὸ δοκεῖν· οὐδὰ τὸ ἀδικον εἶναι ψέγειν, ἀλλὰ τὸ δοκεῖν. Καὶ παρακλεύεσθαι ἀδικον ὄντα λανθάνειν. καὶ ἐμολογεῖν Θρασυμάχῳ, ὅτι τὸ μὲν δίκαιον ἀλλότριον ἀγαθόν, ἐμφέρειν τοῦ κρείττους· τὸ δὲ ἀδικον, αὐτῷ μὲν ἐμφέρειν καὶ λυσitelοῦν, τῷ δὲ ἥττονι ἐξυμφορον. κ. τ. λ. — p. 368.

36) Virtutem omnium bonorum longe esse praestantissimum, Plato summo studio et maxima gravitate docet tum in Politia tum alibi. Et potissimum hoc inde apparet, quod ab initio virtutem ex sua natura atque vi quam maxime aptandam commendat, deinde demum praemia ejus externa tanquam appendicem ejus, qua per se polleat, praestantiae laudat. Polit. X. p. 612. A. B. οὐκοῦν, ἥ δ' ἐγὼ, τὰτέ ἄλλα ἀπαδυσάμεθα ἐν τῷ λόγῳ, καὶ οὐ τοὺς μισθοὺς οὐδὰ τὰς δόξας δικαιοσύνης ἐπηνέγκαμεν, ἀλλ' αὐτὴν δικαιοσύνην αὐτῇ ψυχῇ ἄριστον εὖρομεν; καὶ ποιητέον αὐτῇ τὰ δίκαια ἐὰν τ' ἔχῃ τὸν Τυγοῦ δακτύλιον, ἐὰν τε μὴ, καὶ πρὸς τοιοῦτῳ δακτυλίῳ τὴν Αἴδος κυνῆν. ib. p. 613, E. 614. A. L. IX. p. 508. A.

lum earum gratia, quae illam sequuntur, poenarum, sed propter ipsius naturam ³⁷⁾).

2. Nihilominus nec sapiens et virtute praeditus omnem externam felicitatem aspernabitur. Sed ea omnia, quae vulgo habentur bona, divitias, honores, auram popularem, sensuum voluptates, corporis praestantiam, per se bona esse minime censebit, sed ita duntaxat, si recte adhibeantur ³⁸⁾). Itaque nec illas res sui ipsarum causa quaeret, sed eatenus, quatenus aut internam ipsius praestantiam juvent, aut facultatem praebent bene agendi, ubique cavens, ne per opulentiam aut indigentiam de statu suo dijiciatur ³⁹⁾). Easdem semper leges sequutus in ho-

37) De Legg. V. p. 728. B. C. D. τὴν γὰρ λεγομένην δίκην τῆς κακουργίας τὴν μεγίστην οὐδεὶς, ὡς ἔπος εἰπεῖν λογίζεται· ἔστι δὲ μεγίστη, τὸ ὁμοιοῦσθαι τοῖς κακοῖς ἀνδράσιν κ. τ. λ. Theaet. p. 176. D. E. 177. A. ἀγνοοῦσι γὰρ ζημίαν ἀδικίας, ὃ δαίημιστά ἀγνοοῦν· οὐ γὰρ ἐστὶν ἦν δοκοῦσι, πληγαὶ τε καὶ θάνατοι· (ὧν ἐνίοτε πύσχοῦσι οὐδὲν ἀδικοῦντες) ἀλλὰ ἦν ἀδύνατον ἐκφυγεῖν. Θεο. τίνα δὲ λέγεις; Σω. Παραδειγμάτων, ὧ φίλε, ἐν τῷ ὄντι ἐσώτων, τοῦ μὲν θεοῦ, εὐδαίμονεστάτου, τοῦ δὲ ἀθέου, ἀθλιωτάτου, οὐκ ὁρῶντες ὅτι οὕτως ἔχει, ὑπὸ ἡλιθιότητος τε καὶ τῆς ἐσχάτης ἀνοίας λαυθάνουσι τῷ μὲν ὁμοιοῦμενοι, διὰ τὰς ἀδίκους πράξεις, τῷ δὲ ἀνομοιοῦμενοι· οὐ δὲ τίνουσι δίκην ζῶντες τὸν εἰκότα βίον ὃ ὁμοιοῦται. — Immuneri laudari possent loci, qui huc ferant, sed quos attulimus, sufficient. Si quis velit omnes fere locos huc spectantes cognoscere, adeat Mergensternii Commentatt. de Republ. II. p. 125-130. p. 105 sq.

38) De Legg. II. p. 661. A. D. Menon. T. II. p. 87. E. — 88. D. ὑγίεια καὶ ἰσχύς, καὶ κάλλος καὶ πλοῦτος δὲ ταῦτα λέγομεν καὶ τὰ τοιαῦτα ὠφέλιμα. Ταῦτα δὲ ταῦτα φημὲν ἐνίοτε καὶ βλάπτειν... ὅταν τί ἐκάστου τούτων ἡγῆται, ὠφέλει ἡμῶν· καὶ ὅταν τί, βλάπτει; κ. τ. λ. Responsio est hujusmodi: πάντα τὰ κατὰ τὴν ψυχὴν αὐτὰ μὲν κατ' αὐτὰ οὔτε ὠφέλιμα οὔτε βλαβερά ἐστι, πρὸς γενομένης δὲ φρονήσεως ἢ ἀφροσύνης βλαβερά τε καὶ ὠφέλιμα γίνονται. cf. Euthyd. T. I. p. 281. B. C. D. Menex. T. II. p. 246. D. E.

39) Polit. IX. p. 591. B. C. D. X. p. 618. C — 619 B. Phaedr. T. III.

noribus persequendis, ea fuscipiet munera, quibus meliorem se fieri putet, publice autem privatimque fugiet, quae possint turbare ordinem, in animo suo regnantem ⁴⁰). Itaque neque rei familiaris jacturam, neque vulgi contemtum, neque sensuum voluptatis vacuitatem valde timebit, quum ista omnia per se bona esse non existimet ⁴¹). Immo interdum ipse dolor vim habet salutarem ⁴²). His autem omnibus cogitur, solum sapientem, etiam externae felicitatis habita ratione, vere felicem dici posse, quum et res omnes ita adhibeat, ut nunquam nocivae existant, et jactura illarum minime perturbetur.

3. Quamvis autem negari nequeat, saepe accidere, ut bene malis, bonis male sit; ut hi maximis calamitatibus premantur, illi omnibus vitae commodis abundant, tamen haec ratio non semper et ubique valet. Nam similes sunt injusti cursoribus, qui ab initio celeriter exsiliant, in extremo autem cursu ridiculi fiant, et auribus demissis et sine corona ex turba se proripientes. Veri autem cursores ad finem perveniunt et coronantur. Idem justis viris plerumque contingit. Quamvis enim ab initio saepe contemtu afficiantur, tamen denique bene audiunt, praemiaque

p. 279 B. C. Ὡς φίλος δ' ἂν τε καὶ ἄλλοι ὅσοι τῆδε θεοί, δοίητέ μοι καλῶ γενέσθαι τάνδ' ὅθεν τάξωθαι δὲ ὅσα ἔχω, τοῖς ἐντός εἶναι μοι φίλια· πλούσιον δὲ ἡμίζομαι τὸν σοφόν· τὸ δὲ χρυσοῦ πληθὺς εἴη μοι ὅσον μήτε Φέραιν μήτε ἄγειν δύναίτο ἄλλος ἢ ὁ σάφρων.

40) Polit. IX. p. 591. E. 592. A. — ἀλλὰ μὴν καὶ τιμάσγῃ, εἰς ταῦτόν (τὴν ἐν αὐτῷ πολιτείαν) ἀποβλέπων, τῶν μὲν μετέξει καὶ γεύσεται ἐκὼν ὥς ἂν ἡγῆται ἀμείναι αὐτὸν ποιήσων· ὥς δ' ἂν λύσει τὴν ὑπάρχουσαν ἔξιν, φεύξεται ἰδίᾳ καὶ δημοσίᾳ.

41) Phaed. T. I. p. 82. B. C. D. p. 114. D. E. Gorg. p. 526. D. Menex. T. II. p. 247. E. 248. A.

42) Polit. X. p. 618. A. ἔαν τ' ἐν πένεϊ γίγνηται ἔαν τε ἐν νόσοις, ἣ τινι ἄλλῳ τῶν δοκούντων κακῶν, ὡς τούτῳ ταῦτα εἰς ἀγαθόν τι τελευτήσῃ ζῶντι ἢ καὶ ἀποθανόντι.

ab hominibus referunt. Publicis muneribus, quoties volunt, funguntur, uxores, unde lubet, ducunt, filiasque cui volent nuptui dant. De iniustis autem constat, plurimos eorum, etiam si ad tempus lateant, in curriculi calce, quales sint, deprehenso, ridiculos fieri, et in senectute miseros contumeliore tractari, a peregrinis et civibus verberari, immo torqueri atque exuri ⁴³⁾. Denique soli iusti certissimam semper in Deo ponere possunt fiduciam ita, ut, etiam si in paupertate seu morbis, seu quibusvis aliis, quae mala videantur, versentur, illa omnia sibi ad bonum aliquod conductura, vel viventibus, vel defunctis, sperare queant ⁴⁴⁾. Solus enim qui iustus fieri studeat, Deo carus, iniustus invisus ⁴⁵⁾. Neque a Deo unquam negligitur, qui iustus fieri studeat, et virtutem colens, quantum possit, similis Deo evadere nitatur. Iniusti vero ratio plane contraria ⁴⁶⁾.

4. Denique vero, etiam si in hac vita externae felicitatis retributio nondum satis aequa atque iusta esse videatur, tamen vita est altera post mortem futura, ubi aequa proportio, quam desideramus pulcherrime elucebit. Nam

43) Haec expressa sunt ex Polit. X. p. 613. B - E. cf. Legg. X. p. 900. A. B.

44) Polit. X. p. 612. E - p. 613. A. οὕτως ἄρα ὑποληπτέον περὶ τοῦ δικαίου ἀνδρός, ἅντ' ἐν παντί γίγνηται. τ. λ. v. nota 43.

45) Phileb. T. II. p. 39. A. δ' αἰὶνός ἐστι καὶ εὐσεβής καὶ ἀγαθός καὶ ἀγαθὸς πάντως, ἅρ' οὐ θεοφιλὴς ἐστὶ; — τίμῃν; — τί δὲ; ἀδίκος τε καὶ παντάπασι κακός, ἅρ' οὐ πούναντίον ἐκείνῳ; — πῶς δ' οὐ; adde II. cc. nota 56.

46) Polit. I. c. A. B. οὐ γὰρ δὴ ὑπὸ γε θεῶν ποτὲ ἀμελεῖται ὅς ἂν προθυμῶσθαι ἐθέλῃ δικαίως γίγνεσθαι, καὶ ἐπιγθεῖν ἀρετῇ, εἰς ὅσον δυνατόν ἀνθρώπων ὁμοιοῦσθαι θεῷ. Εἰκός γ' ἐφη, τὸν τοιοῦτον μὴ ἀμελεῖσθαι ὑπὸ τοῦ ὁμοίου κ. τ. λ. cf. Legg. X. p. 905. Apol. p. 41. C. D. — Pulcherrime demonstratur Dei providentia Legg. X. p. 899. D. - 904. D. cf. Morgenstern. de Rep. Comment. II. p. 141 sq.

animus noster est immortalis ⁴⁷⁾. In illa vita praestantissimus quisque perpetua gaudebit felicitate, quisquis praeterea praestantior fieri conatus fuerit, etiamsi nondum evaserit optimus, ea gaudebit conditione, qua facilius possit ad summam praestantiam evehi. Quisquis vero illud non studuerit, ille post mortem in inferiorem sensum delabatur gradum, unde ad virtutem et felicitatem emergio difficilissima est ⁴⁸⁾.

5. Quae quum ita sint, facile aliquis in eam, potest incidere opinionem, ut quum Platoni virtus fuerit sola via ad felicitatem, hanc putet summum vitae finem, virtutem vero medium tantum, quo illam adsequamur. Paullo tamen alia res est, et ita dicendum ex mente Platonis: Virtus est summum bonum hominis, quoniam illa complectitur omnia quae homo desideret. Virtutem non ideo homo sequi debet, quod speret illa se aliquam adepturum felicitatem, sed propterea quod illa eam parit felicitatem, quae sola virtute comparari potest. Itaque non dicit, felicitatem esse finem humanae vitae, quarumque ratione ea comparetur, sed illam felicitatem esse appetendam, quae simul cum virtute paratur, et ab ea seperari nequit. Quamquam igitur Platonis ethicam eudaemonificam esse non negamus, quum homini summum vitae finem ostendat in ea felicitate quae cum ipsa virtute conjuncta sit, tamen inter Platonis et aliorum veluti Epicuri, Democriti eudaemonismum egregium est discrimen.

47) Polit. X. p. 608. C. 615. A. - 621. A. cf. Legg. X. p. 904. C. - 905. C. Gorg. p. 522. E. - 527. E. Phaed. p. 62. B. Iqq. p. 107. B. Iqq. p. 113. Iqq.

48) Vide quae supra de objectiva praestantia, quam Plato homini praescripsit, monuimus. In illis autem quae de vita post mortem futura statuit, Plato imaginationi suae omnia frena remisit, et uberrimum poëtam sese exhibuit, cf. Phaedon. sub finem et Phaedr.

I. Jam si ethicam Christianam cum istis quae modo Platonica sunt exposita comparaverimus, in his tantam deprehendimus similitudinem, ut certe primo obtutu omnia Christiana esse videantur. Etenim

1. Potissimum ponitur momentum in ea felicitate, quam virtus per se et propter suam ipsius naturam parit, in animi tranquillitate ⁴⁹), quae omnium externarum rerum potior habenda sit ⁵⁰), et pro tanta felicitate, ut nunquam probus et virtute praeditus infelix dici queat ⁵¹). Praedicantur beati omnes, qui virtuti se dederint, etiamsi omni calamitatum genere premantur ⁵²). Dicuntur quoque illi vera libertate fruente, qui vitiositatis servitium effugerunt ⁵³).

2. Quae de externa felicitate cum virtute conjuncta, deque divina Providentia in Platone veniunt, ea omnia amice conspirant cum vi praeceptorum Christi et Apostolorum, etiamsi illa ad singulos locos reduci nequeant. Non plane res externas veluti opes, sanitatem, honores et quae sunt ejusmodi, contemnenda esse censent, sed eatenus tantum acquirenda, quatenus illis virtus nostra

49) Jac. III, 18. IV, 1 sqq. 1 Joh. III, 19. Act. XXIV, 16. 1 Cor. XV, 58. 2 Cor. I, 12. Ebr. XIII, 18.

50) Matth. VI, 19. 20. XIX, 21. Luc. XII, 33. Ebr. XI, 26. 2 Cor. IV, 7.

51) Rom. VIII, 28.

52) Matth. V, 3-10.

53) Rom. VI, 19 sqq. coll. Joh. VIII, 34. Haec est sola animi libertas, de qua in Novo Testamento sermo est, De libero arbitrio hominis ne verbum quidem occurrit, sed ex tota vi religionis Christianae apte concludi potest, illud et a Christo et ab Apostolis positum esse et consideratum tanquam res de qua dubitari nequeat. Itidem Plato haud aliter de ea cogitavit, Nihil omnino novit de praesinatione quadam voluntatis humanae. Immo Aristoteles primus litem de libero hominis arbitrio novit. Vide quae Morgenstern disputat, in Comment, II, de Rep. p. 143-145, nota 106.

juvetur. Docent praeterea hominem probum et virtutem sectantem certissime sperare posse fore, ut quae ipsi sint necessaria externarum rerum, ea Deus largiatur ⁵⁴⁾, et si quid mali evenierit id ipsum in commodum atque utilitatem ipsius olim convertat ⁵⁵⁾. Solum enim illum in amore et benevolentia Dei certissimam ponere posse fiduciam.

3. Denique idem illud solatium aeternae felicitatis miseris iisque probis piisque hominibus per ethicam Christianam offertur, et summum in illo ponitur momentum. His omnibus autem efficitur, solum illum qui virtutem sectatus sit, verà gaudere felicitate, id quod Plato eadem vi et industria studuit probare.

II. Quamvis vero haec in universum egregie consentire videantur, tamen in singulis si paullo altius spectaveris diversam deprehendes rationem.

1. Etenim verum est, Christianam quoque ethicam summum tribuisse momentum felicitati ei, quam ipsius virtutis natura praebeat, diverso tamen a Platone modo. Nam plane fere ignorat, eam felicitatem quae ex harmonia et concentu singularum animae partium prodeat, sed omnem felicitatem virtuti propriam quaerit in conscientia recti, et in ea tranquillitate animi, quae ex certissima fiducia divinae benevolentiae nascatur. Neque haec res aliter potuit esse. Quandoquidem enim, id quod supra probavimus, Platoni fuit neque in virtute notio officii erga Deum praestandi, neque adeo in vitiositate notio neglectae legis divinae, cui divinitus poenae immineant, jam sponte sequitur, ut nec de cruciatibus conscientiae mali sermonem injicere potuerit. Quisquis enim ex sententia Platonis est improbus et scelestus homo, ille minime vidit, in virtute sola veram positam esse felicitatem, et in vitiositate sum-

54) Matth.

55) Rom. VIII, 28. coll. II, c. nota 151.

mam miseriam. Itaque nec quidquam timere aut ulla re excruciarī potest. Simulac autem quis cognoverit miseriam esse conjunctam cum vitiositate, et felicitatem cum virtute, hanc sponte appetet, ut beatus per illam evadat; nemo enim suam miseriam velle potest. Itaque non prius conscientia mali potest excruciarī, quam felicitatem in virtute cognoverit; sed vel sic illud fieri nequit, quum sibi conscius sit, se simul cum virtute consequuturam esse felicitatem, nisi fortasse ex pristino delicto malum adhuc ipsi immineat ⁵⁶). Uno quidem loco Politiae ⁵⁷) induci possemus ut putaremus Platonem inter miseriam, scelesti hominis numerasse etiam timorem et terrorem ex conscientia mali profectum, nisi ipse statim adjecisset, sese illum dicere terrorem a servis, quo virum tyranicum (h. e. pessimum quemque) si ampla ipsi contingerit familia, percuti oporteat, quum nemo illi amicus auxilium laturus sit. Hunc autem timorem deinde ad internum hominem transfert, itaque ostendit hominem, qui justam animae rationem non servavit, perpetuo timere debere, ne libidines et ira facta seditione rationem prorsus obprimant. Ex hoc ipso loco manifestum est, de cruciatibus conscientiae mali illum nihil cogitasse, id quod sane reliquis ipsius principiis adfatim est consentaneum ⁵⁸). — Contra vero Christianae

56) Polit. X. p. 612. E. τῷ δὲ Θεοφίλῳ οὐχ ὁμολογήσομεν, ὅσα γε ἀπὸ θεῶν γίνεται πάντα γίνεσθαι ὡς οἶόντε ἀρίστα; εἰ μὴ τι ἀναγκάσειν αὐτῷ κακὸν ἐκ προτέρας ἀμαρτίας ὑπαρχῶς; — πάνυ μὲν οὖν. —

57) ib. IX. p. 578. A. τί δὲ; φόβον γέμειν ἂν οὐκ ἀνάγκη τὴν γε τοιαύτην πόλιν, τὸν τε τοιοῦτον ἄνδρα; coll. quae sequuntur.

58) Est locus Phaedri T. III. p. 842. B. C. ubi Socrates voce Dæmonis sui intelligere videtur conscientiam mali. Quamvis autem ex hoc loco colligi possit, vel Platonem vel Socratem internum actionum judicem non ignorasse (id quod in re atque natura positum est) tamen illum in systema suum Plato admittere non potuit, nisi quatenus iste cum ratione congrueret, jubens vetans actiones. Minime vero de interno aut cruciatu aut

ethices autores ex principiis suis de nulla alia animi tranquillitate potuerunt cogitare, nisi de ea, quae ex conscientia recti profecta sit. Nihil enim unquam loquuntur de partibus quibusdam animae, sed unam tantum animam, cui corpus (σάρξ) sit oppositum, ponunt; itaque nec in concentu et harmonia animae felicitatem quandam ponere potuerunt. Idem tamen fortasse fuisset, si in rationis de sensibus et corpore dominatione ipsa quaesivissent felicitatem, sed nullum istius rei vestigium usquam in N. T. reperitur. Et, si verum spectemus, Plato in his doctior fuit, quam verior, bene enim cogitari potest, vel hominem aut libidinibus aut animi affectibus se duci passum, nullum sentire internae felicitatis defectum, si modo illis satisfacere valeat, nisi conscientia mali excrucietur.

2. Diverfa praeterea est in utraque ethica ratio benevolentiae divinae ad felicitatem. Platoni enim, qui ethicam ideam super ipsum Deum extulisset, benevolentia divina nihil aliud potuit esse, nisi pars quaedam felicitatis universae, vel accessionem quandam, quum homo virtute praeditus vel sine ista Dei benevolentia felix esset et in hac et in futura vita. Minime enim aut ea felicitas, quae posita est, ex ipsius sententia, in concentu et harmonia partium animae, aut ea quae in futura vita justum manet, a benevolentia divina pendet. Ex Phaedro enim apparet, Platonem necessarium fecisse connexum inter virtutem et futuram felicitatem, qui minime a Dei voluntate pendeat. Itaque sola externa felicitas hominis pendere adhuc potest a divina benevolentia. Prorsus tamen alia ratio est in ethica Christiana. Benevolentiam enim divinam conditionem fecit omnis felicitatis. Nam nullam aliam, uti vidimus, cum ipfius virtu-

gaudio actionem quamlibet sequenti sermo esse potuit. Immo totum istum locum de Daemone ad notam Socratis ironicam referre malim.

tis natura conjunxit felicitatem, nisi eam, quae posita est in conscientia boni, et in tranquillitate animi, ex illa profecta. Haec autem ipsa tranquillitas nititur in conscientia ea, qua, ut qui voluntatem dei exsequuti sumus, ipsius benevolentiam certissime speramus. Nisi homo probus sibi persuasum haberet, de benevolentia divina, nec interna gaudere posset felicitate. Praeterea quoque felicitas post mortem futura probum piisque manens, non conjuncta est cum virtute necessitate quadam alia, nisi ea, qua Deus illum infelicem esse velle nequit, qui ipsius voluntatem in his terris perfecerit; itaque necessitate quae intercedit inter virtutem et benevolentiam divinam. Haec omnia autem fluunt ex altiori isto principio, supra exposito, quo ipsius boni notio pendet a voluntate divina, neque ipse Deus notioni (s. ideae) boni est subjectus.

3. Quamvis denique eodem jure ac in Platone cum ethica Christiana contendere possit, illam felicitatem, quae cum virtute acquiratur, et ex virtute sola proficiatur, summum esse finem hominis, tamen simul contenditur virtutem homini tanquam officium Deo praestandum esse injunctam, id quod Plato ex systematis sui ratione minime potuit profiteri. Verum enim est, neminem cogi posse et obligari ut suam ipsius felicitatem appetat, sed quandoquidem virtus est officium a Deo homini mandatum, jure dici potest, hominem obligari, ut, quae cum virtute conjuncta sit, felicitatem omnibus viribus prosequatur.

§. 17.

His expositis jam perspicuum est potissimam fere similitudinem quae inter Platoniam atque Christianam ethicam intercedat, in ipsa hac doctrina de virtutis ad felicitatem ratione esse positam. Breve igitur de hac similitudine feramus judicium necesse est. Singula vero haec sunt:

1. Virtus a felicitate separata homini nequaquam sufficit. Haec autem est non solum Platonis et Christi sententia,

sed omnium antiquitatis philosophorum, qui unquam vixerunt. Diversitas potius inter illos in eo est posita, quod felicitatis diversam notionem habuerunt. Ipsi Stoici dixerunt, solum Sapientem esse beatum.

2. Virtus non est medium quoddam ad quamlibet felicitatem obtinendam, sed cum ipsa est vera felicitas necessario modo conjuncta. Hanc sententiam Plato derivavit ex iis, quae de hominis iustia ratione constituisset, in Christiana ethica fluxit illa ipsa ex altera sententia hacce:

3. Solum probum piunque Deo placere. Idem vero hoc jam in V. T. tam manifesto prostat, ut propter hujus sententiae similitudinem cum dictis Platoniciis, vix aliquis de ethicae Christianae cum Platonica externa conjunctione cogitare possit, ne dicam, quae nihilo secius in his ipsis diversa esse cognovimus.

4. Probus et honestus certissimam in Deo ponere potest fiduciam. Hanc sententiam si quis ex Platoniciis libris quam ex manifestissimis iisque pulcherrimis V. T. et potissimum Psalmorum locis, in ethicam Christianam esse translatam, malit, suam sibi habeat opinionem!

5. Hominem probum manet aeterna felicitas post mortem futura. Hic fortasse aliquis non sine aliqua speciosa ratione contendere possit, Christum principia Platonica, quae tum temporis inter populares suos innotuissent, in suam doctrinam transtulisse. Etenim verum est, in V. T. admodum pauca eaque minutissima vestigia vitae post mortem futurae reperiri, et quum tamen sub Christi tempora inter Judaeos spes vitae aeternae aliquantum obtinuerit, illam ex Platoniciis libris in Judaeam paullatim prorepsisse, non est quam multi statim abjiciant, sententia. Attamen Christus de hac ipsa re in tantum erexit et excoluit populi sui notiones, et ab ipsius Platonis et sentiendi et loquendi de vita aeterna ratione in tantum discessit, ut nunquam putaverim, aut populi sui notionibus, aut libris Platoniciis illum in tanta re esse eruditum. Si quis enim comparaverit descriptionem vitae aeternae, qualis est in libris Pla-

tonicis, cum illa βασιλεία των ουρανών in N. T. exposita, tantum inveniet discrimen, ut minime a se invicem pendere videantur. Immo in hac doctrina cernitur divinum numen, quo Christus afflatus supra omnes omnium saeculorum homines elatus est, ut nec ante neque post ipsum alijs ququam ipsius sententiam aut irritam reddere, aut quovis modo mutari, aut una notula augere valuerit.

Sed, ut tandem in universum de externa Platonicae atque Christianae ethices cohaerentia iudicium feram, in hanc fere sententiam discedo: Quamquam inter Judaeos Platonicas quasdam doctrinas innotuisse, et a viris doctis in vulgus etiam manasse, satis probabilis reddi potest sententia, tamen minime illae egregiam exercuerunt vim in doctrinam Christianam, quum quae in universum similia esse videntur, aut in singulis vehementer discrepent, aut ex potiori fonte derivari queant. Et profecto quae Christus cum Platone communia habet, longe illa minora sunt, quam quae egregia atque divina illis addidit! Nec omnino cernitur causa, quidni qui majora invenerit, et minora ille ex suo ingenio haurire potuerit!

CAPUT IV.

DISQUIRITUR, QUOD PLATO VIRTUTIS INITIUM
ESSE VOLUERIT, EJUSQUE AD CHRISTIANAM ANIMI
EMENDATIONEM (μετάνοιαν) RATIO.

§. 18.

Ex omnibus, quae hactenus sunt disputata de vi atque natura virtutis, ejusque ad felicitatem ratione, necessario modo cogitur, Platonem initium omnis virtutis posuisse in cognitione ea, qua homo intellexerit, se virtute sola veram adepturum esse felicitatem. Studium enim hoc est

omnibus commune, ut felices esse velint, quisquis igitur non intellexit, virtutis naturam eam esse, quae hominem sola vere beatum reddere valeat, ille nunquam antea virtutem sequetur; e contrario vero, quisquis virtutis et ipsius boni naturam, pulchritudinem et praestantiam, qua ipsa felicem reddit sui possessorem, intuitus est, ille non potest, quin ipsam virtutem, ipsumque bonum omnibus viribus appetat ⁵⁹). Hinc autem efficitur, non voluntatem eam qua homo iustus fieri cupiat esse initium virtutis, sed cognitionem boni ipsius. Scelestinus enim quisque, quum iustus esse studet, non voluntatem mutavit, quum ut qui ab initio, id quod omnibus commune est felix esse studuerit, sed cognitio ipsius mutata est, quum jam intellexerit, nulla alia via felicitatem veram acquiri posse nisi virtute. Itaque ex Platonis doctrina minime opus est, ut eum, qui ad virtutem emergat, vitae antea gestae poeniteat, utque confiteatur, se impie et perperam egisse. Sed illud tantum cognoverit necesse est, se via esse ingressum, qua nunquam vere felix evadere potuisset, et, eatenus, sibi opprobria faciet, quatenus aliquamdiu sese ipsum vera felicitate privaverit. Demens igitur est et insanus, ex sententia Platonis, qui virtuti non studuerit, nullam vero aliam ob causam damnandus. Quodsi de emendatione hominis sermo injicitur, illa est Platoni non animi et voluntatis, sed ingenii et cognitionis mutatio. Omnia vero haec ex potiori causa nulla ducuntur, nisi ex ista ratione virtutis, qua notione officii et obsequii Deo praestandi illa privata est.

§. 19.

Jam vero in ethica Christiana prorsus aliam obtinere rationem, non est quod amplius dubitari possit. Quum

59) v. ll. cc. nota 51. adde Theaet. T. I, p. 176. C. ἡ μὲν γὰρ τοῦ-
του (τοῦ δικαιοτάτου) γνώσις, σοφία καὶ ἀρετὴ ἀληθὴς ἡ δὲ ἄγνοια,
ἀμαθία καὶ κακία ἐναργής.

enim summa virtutis ponatur in obsequio divinae voluntati praestito, nec ulla potior sit causa, qua homo ad bene agendum moveatur, quam ipsius dei voluntas, initium virtutis est firma voluntas, firmumque propositum, officium praestandi, et Dei voluntati obsequendi. Quamvis enim omnis virtutis cognitio Dei, cui ut summo legislatori et iudicii actionum humanarum obtemperandum sit, necessaria sit conditio, tamen haec ipsa minime est virtutis initium. Sunt enim quam plurimi homines, qui et ipsorum interna conscientia et institutione, illam Dei cognitionem habeant, nec tamen ea voluntate agantur ut praecepta divina exsequantur, sed ad impia et scelestia omnia ferantur, ne minimum quidem Deum curantes. Quandoquidem vero in voluntatis et animi emendatione (μετάνοια) positum est initium virtutis, necesse est, ut homo simulac voluntatem in Deum intenderit, confiteatur, se peccasse et perperam et impie egisse, et hac ipsa conscientia animo eonteratur. Jam enim homo non solum intelliget, se minus antea felicitatem suam veram curasse, sed excrucietur praeterea gravissima conscientia, sese peccasse in Deum, benevolum sui patrem summumque iudicem, qui legem dederit, ut quam in animo hominis suam esse voluntatem patefecerit, illa omnibus viribus servaretur, nec se dementem [solum et insanum antea fuisse iudicabit, sed impetum et divinis poenis dignissimum. Haec vero est illa egregia Christianae religionis doctrina, cui nullius alius ethices simile quidquam e regione ponere queas. Itaque in ista animi emendatione tantum et Christus et Apostoli posuerunt momentum, ut nullum fere nomen satis grave existimarent, quo illam denotarent ⁶⁰⁾. Et, licet hisce plura contineantur, quae

60) καλὴ γενεὰ Joh. III, 1 sqq. Tit. III, 5. 1 Petr. I, 23. καὶ ἡ κτίσις, ἀνακαίνωσις Eph. II, 10. IV, 20-24. Col. III, 9-12. Gal. VI, 25 sq. Rom. XII, 2. VI, 15. καὶ ἡ ζωὴ ἐν ἀνάστασις Rom. VI, 14 sq. 1 Petr. II, 24. ἀγιασμός Rom. VI, 19. 1 Petr. I, 2. 1 Thess. IV, 3. cet.

tantum nisi ad Iudaeos et Paganos istius temporis spectent tamen etiam hodie generalis istorum notio in nostros homines ubique cadit.

EPILOGUS.

TOTIUS COMMENTATIONIS SUMMA BREVITER REPETITA FIT CONCLUSIO.

§. 20.

His quidem omnibus expositis, et comparatis ita, ut in quaque re Platonicae atque Christianae ethices et consensus et discrimen elucescat, omnia mihi visus sum tetigisse, quae in tali comparatione alicujus momenti esse possint. Quibus tamen absolutis, ut melius adhuc singula perspiciantur, juvat illa brevibus verbis repetere, et in quibus utraque doctrina ethica aut consentiat, aut dissentiat, juxta se ponere. Consensus vero nititur in his singulis sententiis:

1. Deus est summum bonum, et quisquis hominum fit praestantior, eo ipso Deo appropinquat.
2. Deus hominum animis notionem boni informavit.
3. Virtus est rationis de animi affectibus et libidinibus victoria, ita tamen ut justa omnium maneat ratio.
4. Virtus ex sinceris principiis proficisci debet, alias non est vera virtus; itaque non erit illa invita, neque sui commodi et praesentis voluptatis, aut ostentationis studiosa.
5. Virtus nunquam vel temporibus vel quavis fortuna mutari debet, sed semper sibi constans erit.
6. Virtus nunquam in hac vita summam adsequitur praestantiam, sed in dies perfectior reddi potest.

7. Virtus amplectitur universi hominis naturam.
 8. Virtus homini minime sufficit, nisi illa fiat vere beatus.

9. Sola virtute veram felicitatem adipiscimur.

10. Vera felicitas est ea, quae cum ipsa virtute conjuncta est, interna animi tranquillitas.

11. Solus virtuti incumbens, certissimam in Deo ponere potest fiduciam, et sperare vel mala omnia sibi in bonum aliquod cessura.

12. Externa omnia non per se bona sunt, sed virtute demum vere bona fiunt.

13. Hominem probum ac honestum manet aeternae vitae felicitas. Contra vero, in quibus ethice christiana a Platonica discedat, haec sunt:

1. Deus non solum est boni ideae in homine auctor, sed ipsius boni auctor, quatenus nihil est bonum, nisi ea de causa, quod Deus id ipsum jusserit, et bonum esse voluerit. Inde bonum cogitando et agendo prosequi, est officium hominis divinae voluntati praestandum.

2. Cognitio praestantissima boni eam solam ob causam est appetenda, quia illa moralis praestantia s. virtus hominis augetur; itaque ethica Christiana hominem Deo similem fieri jubet non cognitione rerum, sed praestantia vitae.

3. Summa praestantia hominis non est objectiva, sed subjectiva, ita, ut is sit praestantissimus, qui iis quae divinitus sibi concredita sint, optime usus est.

4. Virtus non solum est rationis, sed potissimum animi et cordis ita, ut illa ex amore Dei et proximi fluat.

5. Necessaria virtutis conditio est fides, s. illa persuasio, qua nihil agamus nisi quod divinae voluntati consentaneum esse censeamus, unde virtus simul est pietas in Deum.

6. Virtuti adjuncta esse debet animi submissio erga Deum, ne unquam nimium nostris viribus tribuamus, sed

ut quocunque prae aliis excellimus, Deo acceptum referamus.

7. Animus saepe intendendus est in Deum O. M., patrem et creatorem nostrum benignissimum ita, ut preces ad illum fundamus, et de interna nostra conditione cogitemus.

8. Summa felicitas cum virtute conjuncta est conscientia recti et divinae benevolentiae.

9. Benevolentia divina est omnis felicitatis necessaria conditio.

10. Quamvis felicitas ea, quae virtute acquiritur summus finis sit humanae vitae, tamen virtus est officium Deo praestandum, quoniam illa ipsa felicitas est Dei voluntas.

11. Initium denique virtutis est *μετανοια* h. e. firma voluntas, qua Dei in omnibus voluntatem sequi decrevimus, conjuncta cum pristinatorum peccatorum sincera confessione et animi tristitia.

Quodsi haec omnia contemplerur, manifestum est, par fere inter doctrinam Platonis ethicam et Christianam esse discrimen ac consensum, ita tamen ut quae prorsus sibi contraria sint, ex una illa notione fluant, qua virtus tanquam officium Deo patri ac Domino hominum praestandum, a Christianae doctrinae auctore repraesentatur. Reliqua dissimilia non sibi invicem repugnant, sed nonnisi alio modo sunt descripta.

Summa igitur et peculiaris ethicae Christianae notio haec est, quod voluntatem Dei illam fecit causam, qua homo in omnibus actionibus duci debeat. Vetuit tamen ne servilis et invita inde existat obedientia, quum omnem virtutem ex amore derivaverit. Etiam si vero ethica Christiana in nulla alia re emerit, quam hoc ipso fidei et amoris principio, tamen ob illud ipsum merito illam divinam vocemus. Tanta enim isti inest vis, ut nemo possit esse tam rudis, tam ferus et ab omni humanitate alienus, quin illa doctrina cognita atque perspecta

ad optima quaeque, omnisque vitae praestantiam feratur. Hinc factum est, ut ethica Christiana in omnium gentium atque nationum animos tantam vim exercuerit, quantam philosophia aut antiquitatis, aut recentiorum temporum nunquam vel obtinuit, vel obtinebit. Quodsi Platonem divinum esse concesso, Christum Deum confiteamur necesse est.
